

東
華
續
錄

東華續錄

同治七十三

臣王先謙敬編

臣張式恭恭校

六月丁未朔諭軍機大臣等榮全奏籌辦誤擄牲畜情形一摺據稱棍噶扎勒參誤擄牲畜一事業經會同麟興錦丕勒多爾濟籌議賠償銀兩備文飛咨俄人約地會辦咨商李雲麟等未據回覆等語此事既據榮全等籌商辦理自應迅速了結若待李雲麟咨覆到日再行商辦往返耽延著榮全會同麟興錦丕勒多爾濟迅將此事辦結不可拘泥誤事一面分定烏里雅蘇台邊卡界址與俄人約至邊界會立鄂博界牌分定限址以正疆界布倫托海亂萌初起尤須速籌弭患之方李雲麟何得藉安設臺爲名避往青格勒地方置本任於不顧著懷遠前旨馳回本城會同明瑞等

亟籌戡定並將立界事宜安速辦理毋得規避貽誤致干罪戾將此由六百里各諭令知之○諭麟興榮全奏請飭土爾扈特盟長速赴布倫托海一摺土爾扈特盟長布彥鄂勒哲依圖來京呈請特派大臣帶兵進剿烏魯木齊回匪該盟長帶領所屬官兵會同征剿曾經諭令該盟長前赴布倫托海地方聽李雲麟辦理見據麟興等奏稱該盟長自起程後所屬部落復被烏魯木齊吐魯番等處回匪滋擾該遊牧接仗失利陣歿多人喀喇沙爾地方不能居住見已移至大小珠勒都斯等處各情見在該盟長所屬部落人眾日久無人統率誠恐眾心惶惑別生事端布彥鄂勒哲依圖由京起 是否業已出口著理藩院即行查明令迅速由驛馳赴布倫托海聽候李雲麟酌量情形辦理並著李雲麟明瑞錫齡遵奉前諭接濟照料妥爲羈縻毋使別生枝節麟興等另摺奏見

調蒙兵未能起程並送越界俄人出境及拏獲普哈爾夷人各摺
庫倫所屬東西兩盟僅能派兵四百名尙無起程日期扎薩克圖
汗寶因諾顏兩盟長應行續派之兵又因情形苦累軍械駝馬口
糧均未能自備著麟興等卽飭令各該盟長等將所派各兵均行
停止以示體恤唐努烏梁海地方越界俄人旣經該總管等設法
查辦護送出境交俄目收回仍須防其復來並著麟興等飭令該
總管等隨時巡防毋任再行越界滋事所有此次出力之候補防
禦瑪祿堪等三員均著先行存記俟另有勞績彙案請獎普哈爾
賢夷人迷失路徑誤至烏城旣非奸細不必羈禁著麟興等妥
爲撫恤並咨詢俄國邊界官如可由俄國遞回普哈爾之處卽著
設法送回該部落以示羈縻將此諭知理藩院並由六百里各諭
令知之○撥部庫銀二萬兩解烏里雅蘇台○步申李鴻章奏捻

股由臨邑被擊南趨臣先令郭松林潘鼎新周盛波王心安等自臨邑陵縣聯紮牆汜至恩縣德州境內與馬頰河民圩接續但空出臨邑南至濟陽濱河百里以冀偪賊回竄西南一隅就地圍紮聚而殲旃詎該逆背竄濟陽連夜折回東北當派張曜宋慶拔隊探追郭松林等所紮牆濠於五月二十日竣工卽酌留隊伍於長牆適中處紮立老營以資防護一面挑派精銳馬步進剿並令周盛波周盛傳帶八成隊進駐吳橋甯津交界以備名軍偪賊回竄時急起截擊二十二日張曜宋慶偵知賊竄海豐之北又折而南該軍卽由武定向濱州截追二十四日敗賊於濱州西南之白家橋擊斃甚夥該逆向陽信竄去是日郭松林王心安帶隊行抵樂陵東北副都統春壽亦帶馬隊趕至探報賊由信陽直奔海豐遂於二十五日督軍分路進剿王心安繞至賊後衝殺郭松林等由

外殺入將賊隊截爲數段生擒八百餘名陣斬千餘名並擒著名逆酋周老廣兄弟及大小賊目多名二十六日賊向西竄追七十餘里擒斬百數十名二十七日賊由樂陵竄至吳橋闖入周盛波周盛傳紮營之毛家莊一帶周盛波等偵賊突至先將步隊設伏密林中以馬隊分作三路誘賊周盛傳將步隊亦分數起伏在馬隊左右騎賊二萬餘分股猛撲我軍嚴陣迎敵賊仍死拒不退周盛波復令下馬鏖戰步隊伏兵並起槍礮雷發斃賊千餘敗匪一股向東回竄一股向西南竄踞離德州七十里之楊丁莊孫世官莊方家莊一帶周盛傳等乘夜進襲賊巢一擁而入該逆自相蹂踐死者無算槍斃張總愚之姪張三彪並生擒逆首李老懷及大小賊酋等數百名餘匪惶遽四散二十八日左宗棠追軍亦至郭松林馬步相繼追及各有擒斬臣在德州派弁梭探中途搜獲零

匪沿路民團截獲賊騎亦多自今歲北征以來未有如是大捷實足伸天討而快人心據獲賊供稱張逆被勦情急日夜圖竄運河以求生路見在馬頰河西化長牆臣與丁寶楨督催官紳趕緊興築漸有頭緒賊若遁入西南究多一層障礙若仍游弋東北捷地減河防軍較厚都興阿業經前進當無他虞惟東光南皮以上河西兵團尙少處處可慮劉松山郭運昌各軍諒能就近遮護運河水勢日涸先經咨商河南撫臣李鶴年濬彰德之萬金渠築懷慶之九道埝使洹河丹河泉源下注日來運水僅增尺餘尙恐不足限賊黃河伏汎迄未嘗漲曾國藩所派黃翼升歐陽利見張之萬所派姚廣武等各師船皆阻泊張秋河口未能北駛濟急臣見飭郭松林等仍乘勝會合各軍分路兜追周盛傳吳長慶仍駐陵德吳橋之交以備攔擊兼護東境運防總期早蕩餘氛仰慰 聖廑

至此大截勦尤爲出力各員籲懇

天恩先行給獎以示激勵知

縣黃振楚等請飭部從優議卹其餘出力勇弁可否容

臣彙案保

獎出自恩施又奏五月二十四日潘鼎新督軍追賊至武定東南

會合陳國瑞張曜宋慶由樊家橋分路兜擊均獲小捷二十五至

二十七等日追過海豐慶雲樂陵沿途亦有擒斬二十八日賊將

折往西南遂會同善慶溫德勒克西徑向德平攔擊大獲全勝賊

屍徧野追至解家店一帶始行收隊

臣

仍飭催乘勝兜追以冀一

鼓殲除上諭軍機大臣等捻逆竄擾濟陽等處經各軍分投攔

擊斬馘甚眾敗賊一股向東回竄一股竄踞離德州七十里之楊

丁莊等處見在進剿既經得手著李鴻章檄飭各軍乘此聲威會

籌掃蕩迅殄逆氛張逆被剿窘急圖竄運河以東以求生路自係

意中之事且東光南皮以上河西兵團皆少殊慮空虛李鴻章當

會商左宗棠等嚴密布置認真守禦馬頰河西長牆丁寶楨卽督飭官紳趕緊興築剋日蒞工以資障蔽捷地減河一帶著都興阿崇厚激勵將弁實力堵禦毋任該逆再行北竄運河水勢日涸尤爲可慮雖經李鴻章咨商李鶴年使洹河丹河泉源下注惟日來運水僅增尺餘應如何設法疏濬俾該逆不得偷渡之處著李鴻章妥籌辦理英翰卽統率所部協同剿洗爲四面聚殲之計見在賊勢窮蹙事機較爲順手該將軍督撫等務當同心協力扼運防一面督飭前敵諸軍實力兜剿並檄令在防將士認真盤詰不使匪徒偷越是爲至要將此由六百里各諭令知之○諭庫克吉泰劉典奏秦楚各軍連獲勝仗同逆退竄董志原仍飭各軍嚴防一摺回酋馬正和糾合涇河川踞賊竄撲長武經總兵閻定邦會同劉正高等迎剿獲勝適黃鼎雷正綰各軍乘勢夾擊賊皆敗

竄長武城圍立解其竄擾三水之賊亦經知縣喻兆圭擊敗竄向
正甯知縣劉倬雲等復擊之於萬家村原上並會商高連陞分道
直追該逆悉回竄董志原老巢此次管帶甘軍之閻定邦會同長
武官紳固守城池擊賊獲勝所有該軍出力將士及該縣官紳著
庫克吉泰等擇尤彙保毋許冒濫見在三水邊境雖臻安謐而宜
川之雲巖鎮有捻逆餘孽勾結土匪潰勇勢甚披猖庫克吉泰劉
典務當嚴飭劉端冕等各率所部跟蹤追剿以期就地殄滅毋任
蔓延其隴鳳邠鄜各屬地方賊氛尙熾並著檄令在防將士嚴加
堵扼不准稍有疏虞將此由五百里各諭令知之○予山東陣亡
知縣黃振楚副將劉斌等祭葬世職○已酉左宗棠奏五月十八
日賊自武定竄樂陵邊騎至海豐霑化一帶劉松山郭運昌富珠
哩訥蘇肯各率所部於二十二日追抵海豐訥賊復將北竄遂屯

海豐之西待之二十四日夜探報賊竄海豐之水灣集龐家集吳家廟等處我軍向東北急進五鼓圍攻賊巢賊祇防南路潘鼎新等軍往襲不意我軍橫繞而來出其北面逆首張總愚不知所爲三莊賊黨七八百人不及上馬斬殺略盡各莊之賊倉卒齊隊經官軍乘勝縱擊潰敗狂奔追殺十數里賊向西竄官軍追至慶雲城南斃賊千名生擒四百七十餘名二十六日追至南皮偵賊竄踞砥橋各村我軍四鼓行近賊巢獲賊訊供知張總愚夥黨團聚砥橋各村樹林下將行矣劉松山商令郭運昌富珠哩訥蘇肯向南進親率所部向西進賊驚覺南潰官軍併力擊斃甚多追抵甯津縣境又擒斬百數十名仍向西南進至李家橋據探賊忽折由東南竄三寶店劉松山令步隊左右兩路同馬隊先進張遠勢爲包鈔之兵中路由大道緩進爲正兵三面圍殺屍橫徧野計斬悍

賊數百名生擒賊目郭泳汰等多名餘賊二百餘名方賊竄海豐
臣率親軍由東光至南皮交界之樸莊擬俟賊由西南竄出迎剿
嗣賊經劉松山等遮其西路徑向南趨其時連鎮一帶運流復落
防務緊要二十四日仍引軍回連鎮老營二十七日探報賊竄東
光縣東卽夜又竄甯津臣派親軍馬步全隊赴吳橋甯津之交截
之是夜駐吳橋之雙柳店賊見兵至折向東南各營於是夜四鼓
向東南急進二十八日未刻抵山東陵縣沿途遇散逸之賊絡繹
不絕或赤體無衣或有馬無鞍見官軍至輒伏地乞命驗其髮長
貌很者斬之餘押帶歸營訊明籍貫分別遣釋惟副將楊鳳元率
馬隊前行遇騎賊數百殲斃數十名賊折向東北絕塵而奔追之
無及查此次逆賊被創兇殘大衰黨夥披離不能歸隊然巨逆自
知罪大難邀曲宥皖豫諸匪以原籍辦理過嚴歸路已斷其直隸

山陝一帶裹脅之人尤恐遭直東民團殺害故不得不忍死嘯聚苟合須臾臣竊謂賊無不滅之理亦斷無殺盡之理如果將士一心隨賊所在或迎擊或橫截或尾追此倡彼隨聲勢聯絡則以十倍之官軍擊數千之悍賊亦有餘力所謂賊無不滅之理也其輸誠求撫之匪如給免死護照回籍後別無違犯則地方官司不准牽引舊案絕其自新之機至民團之盤詰宜嚴而擗殺在所當禁所謂賊無盡殺之理也見在賊蹤折向東北劉松山等馬步各軍仍駐甯津之北相機而動惟南路兵丁甚厚而直隸運河一帶除臣所部駐運東防勦外西岸僅劉祺三營及李昌連兩營自連鎮北至減河僅遵化練軍三營此外全係民團且難一律勻布未足深恃見擬與官文都興阿其籌妥策務期計出萬全 上諭軍機大臣等此股賊匪疊爲南北官軍所敗其勢已衰惟張逆狡猾異

常非乘其黨夥披離四面兜擊不能殄此渠魁左宗棠務趁官軍得手之時檄令劉松山等各率所部會合南北各軍乘機剿洗李鴻章英翰丁寶楨亦當嚴飭各將領前截後追毋任該逆得以喘息仍一面固守運防使無竄越都興阿計已馳抵減河何以久無奏報卽著會同崇厚迅飭陳國瑞等併力前進以期南北夾擊迅掃逆氛捻眾雖多其中勢窮被脅無路逃歸者諒亦不少茲據左宗棠奏稱賊無不滅及賊無盡殺等語不爲無見嗣後官軍接仗該逆眾如有投械乞降非罪在不赦者著該大臣督撫等分別遣釋給以免死護照回籍後如別無違犯地方官概不准牽引舊案故爲誅求並著出示曉諭各該州縣所屬圩團遇此項人眾遣歸止准隨時盤詰毋得藉端擅殺以示矜全並一面出示如有能將該逆首縛獻者給予重賞使賊眾自相猜忌易於一鼓成擒左宗

棠見駐運東其西岸僅安陵有劉祺三營十五口僅有李昌連兩營連鎮北至減河僅遵化練軍三營其餘全係民團又難勻布逆蹤屢圖北竄直隸運河一帶空虛甚屬可慮卽著左宗棠就近會商都興阿崇厚妥籌布置以壯北路聲威並著官文嚴飭臬司張樹聲於河閒等處民團妥爲勸諭與各官軍聯絡聲勢實力嚴防毋令賊蹤擾及復肆蔓延將此由六百里各諭令知之○諭穆圖善奏甘省兵力不敷請仍畱陝西撥兵會防邊內東路並涇州危急情形咨催楊占黿赴肅州請以謙禧署副都統各摺片前諭穆圖善飭金順一軍繞赴東路以保完善茲據該署督奏稱陝回漸已繞越入甘不惟磴口包頭等處最關緊要且恐甯靈已撫之回被其偪脅金順一軍專防陝西北境難令分赴東路請飭陝軍分出數營駐防東路所奏尙係實在情形著庫克吉泰劉典迅卽抽

調勁旅就近繞赴東路並飭令劉厚基高連陞等於延安榆林綏德鄜州等處兼籌防剿穆圖善仍當嚴飭金順相機夾擊轉戰而前毋得株守一隅意存諉卸備完善之區稍有損失恐不能當此重咎也金順軍已入陝所需糧餉軍火卽著庫克吉泰劉典隨時撥濟毋令缺乏仍在陝西應解甯夏軍營月餉抵扣以清款項回匪呂得彥等燬陷鎮原慶陽甯州等城大股圍撲涇州勢甚猖獗著穆圖善迅卽添撥勁兵會同雷正綰力圖掃蕩並著庫克吉泰劉典飭令黃鼎併力勦洗雷正綰總統慶涇諸軍實無旁貸著穆圖善傳知該提督務須振刷精神早奏廓清之效毋得縱賊蔓延致干罪戾鎮原縣城收復有無捏飾情弊慶陽甯州已否收復各城文武官員下落均著穆圖善確查分別參奏前成祿奏楊占鼐已行抵高臺卽著該署督飛咨楊占鼐迅將肅州軍務接辦以便

成祿剋日出關甯夏副都統一缺准其以謙禧暫署仍著穆圖善詳細查看能否勝任據實奏聞俟善山保一軍接替有人即著前往署理以重職守將此由六百里各諭令知之○諭崇實奏川軍駐防陝境連獲勝仗等語四川李輝武一軍赴陝助剿扼守寶鳳一帶在寶雞等處疊挫賊鋒乘勝直搗周源立將賊巢平毀該逆悉數逃竄渭河北岸一律肅清崇實復派提督唐友耕等爲該軍援應著卽傳諭李輝武等互相聯絡以壯聲威渭北一帶得此一軍扼守據崇實奏稱回逆不敢竄入南山與漢兩府皆可無虞其應否令李輝武盡率所部會合陝軍跟蹤追剿之處著崇實劉典相度機宜會商辦理不得顧此失彼另摺奏官軍進剿越竊夷巢連獲勝仗攻破普雄石城該夷族類甚眾犬羊之性反覆無常亟宜乘勝制服俾能革面洗心庶不至重煩兵力仍著崇實督飭將

士及地方文武勦撫兼施恩威並用以期綏靖嚴疆將此由六百里各諭令知之○刑部尙書綿森卒贈太子少保予祭葬諡端愍賞銀五百兩治喪子郎中奕沆以四五品京堂候補○庚戌調瑞常爲刑部尙書存誠爲工部尙書以崇綸爲理藩院尙書調魁齡爲戶部左侍郎轉恩承爲工部左侍郎以明善爲工部右侍郎

藍旗滿洲副都統遷

○辛亥諭軍機大臣等戶部奏籌辦銅斤請催各督撫

認真辦運一摺京師自滇銅停運鼓鑄不能加額曾經戶部奏令四川省派員在瀘州一帶設局採買滇銅由湖北轉運天津並議准林鴻年所奏雲南川東所屬各廠每年額辦京銅三百六十萬斤運赴川楚變價迄今日久並未據該督撫覆奏實屬遲誤著崇實吳棠劉嶽昭岑毓英宋廷春各將該省招商開廠設局收買等事宜迅於三月內妥議章程具奏由部指撥有著之款解往分起

辦運不得如前因循以重國法蘆州存積滇銅湖北應如何分局收買及施宜等處銅礦能否開採著郭柏蔭何璟迅飭妥議奏明辦理至紅銅條銅足資鼓鑄應如何體察華洋商販情形隨時變通設法採買之處著曾國藩英桂馬新貽瑞麟丁日昌李瀚章李福泰趕緊籌辦不准空言塞責原摺著鈔給閱看將此由五百里諭知曾國藩崇實英桂吳棠馬新貽瑞麟劉嶽昭郭柏蔭李福泰丁日昌李瀚章岑毓英並傳諭朱延春何璟知之○癸丑諭軍機大臣等都興阿奏酌度兵力擬親督進紮會剿並陳國瑞連日剿賊大勝及請飭定安移紮泊頭鎮崇厚奏豫籌善後事宜各摺片減河等處防務誠爲緊要該大臣布置既定卽當統兵前進與李鴻章左宗棠等軍會剿斷不准託詞河防遷延不進明慶等所部馬隊值此炎暑自不能無疲乏惟其中有無扣剋糧草等情該大

臣亦當嚴密查明懲辦以清宿弊據奏陳國瑞獲勝情形尙屬出力著卽嚴飭該侍衛會合各軍乘此得手之時迅速進剿一鼓殲除副將丁錫金前經左宗棠英翰參奏降旨革職嚴拏何以見在陳國瑞營中帶隊著都興阿查明辦理定安所統官兵與泊頭鎮相近該處地屬緊要卽著恩承與定安安商移紮泊頭鎮以資防守崇厚所奏豫籌善後各條不爲無見該將領兵勇棄家從征轉戰數省情本可憫此次捻逆蕩平朝廷必沛恩施著該將軍督撫等豫行傳知該將領兵勇等俟捻逆殄滅後其將領中已補缺者卽赴本任願休息者准其回籍其兵勇願遣散者卽行賞送歸農內有驍健之勇無家可歸者卽著酌給口糧於各省扼要處所派員管帶駐紮用資鎮撫儻有果敢之士願奮勉西征者並著該大臣等曉諭令其自行報名精加遴選使之踴躍從軍立功上進以

備干城之選將此由六百里各諭令知之○諭都興阿奏降勇無故潛逃請飭山海關副都統盤查並盛京將軍等飭屬嚴拏等語據稱劉景芳前由奉天所帶投誠馬勇許占一隊下勇目李維忠原名維藩綽號烏痣李李振隆綽號李老疙疸勇丁徐萬良丁萬幅董勒李恒等共六名自到直省以來尙屬安分許占一戰歿後此項勇隊所贖無多都興阿前在盛京將軍任內深知李維忠李振隆等不法情事惟業經投誠姑俟其戴罪立功茲覽該大臣所奏該犯等無故潛逃是稔惡性成必致潛回奉省復逞故技擾害地方且數月以來該犯等習見捻逆詭譎情形爲患尤非淺鮮若不亟行拏辦勢將餘孽復萌著長善密飭在關人役詳加盤詰毋任乘隙遠颺並著奕榕富明阿額勒和布恩錫通飭所屬各該文武嚴密躡緝務將該犯等按名弋獲毋令潛匿滋患該將軍副都

統等一經拏獲卽將該犯等就地正法以絕根株將此由五百里各諭令知之○以石贊清爲左副都御史

由宗人府府丞遷

○甲寅諭軍

機大臣等文麟景廉奏前起二營已抵沁城並酌給營勇糧石一摺魏忠義所帶二營已抵哈密沁城據報營官孔才所部因哈密乏食眾議東行經烏城委員途遇勸阻撥給口糧眾勇見投回沁城魏忠義以孔才營勇飢不可待撥給糧二千餘石不過暫濟目前文麟景廉見已派弁前往敦煌守催糧石著於此項糧石到日迅速分撥哈密駐防各營免致飢軍譁潰一面飭令魏忠義將孔才營勇口糧設法通融勻撥毋任缺乏該營雖照舊安紮仍須有大員親往彈壓撫輯方免滋生事端文麟當剋期迅赴本任以資鎮攝並將哈密防勦事務妥爲經理不得藉故耽延景廉著仍遵前旨暫駐後路嚴防安敦玉一帶並催運軍糧隨時接濟其屯田

事宜關繫緊要仍著文麟等迅速商辦毋託空言將此由六百里
各諭令知之○諭麟興等奏查看布倫托海大概情形並籌辦烏
城難民各摺片奎昌等奏確探西路情形兼籌防守等語布倫托
海屯田守備李俊倡率奇古難民搶劫官營財物軍械並將霍博
克賽里土爾扈特等旗牲畜等項劫奪殺害蒙古人眾甚多該逆
初起時僅百餘人見在裹脅漸眾其勢日熾若不趕緊撲滅將來
益難收拾土爾扈特汗布彥鄂勒哲依圖見已由京起程前赴該
旗遊收計期當已行抵烏城著麟興榮全催令布彥鄂勒哲依圖
兼程馳赴布倫托海統帶所部遊牧進剿並著李雲麟明瑤飭令
霍博克賽里土爾扈特三旗備集兵丁二千名聽候該汗調遣新
城所屬郡王一旗備兵五百名卽由李雲麟明瑤飭派科布多貝
子旗下兵五百名卽由奎昌福濟車林多爾濟飭派均由布彥鄂

勒哲依圖統帶進剿李雲麟卽應親率滿兵及烏梁海兵前進援
應至三路進兵會剿之議或恐兵分力單難於得力李雲麟當酌
度機宜妥慎籌辦不可拘滯成見總以迅殄逆匪毋任蔓延爲要
錫綸見在行抵何處著卽迅赴布倫托海會同李雲麟明瑤籌辦
趕緊進剿烏科兩城地方並著麟興奎昌等嚴密防守烏城迪南
所居奇古難民麟興等擬辦團練立營收聚著卽揀派妥員剴切
曉諭辦理毋任爲逆匪勾結並著飭令扎薩克圖汗部落各旗嚴
密設法防堵其科布多所屬蒙古部落亦著奎昌等飭令一體防
堵以備賊匪繞路劫奪逆首李俊究竟因何起事著福濟錫綸懷
遵前旨前往查辦如果李雲麟有辦理不善激變情事著卽據實
參奏毋稍隱飾麟興等另片奏請將前赴布倫托海查探委員獎
勵等語六品頂帶筆帖式依徹布著准其作爲防禦先換頂帶以

示鼓勵奎昌等另片奏請令烏梁海貢皮照例呈進等語烏梁海
本年應進貢皮著仍照舊例交科布多呈進不准違誤將此由六
百里各諭令知之○廣廣東潮州府學額二名○于甘肅殉難知
縣于銓祭葬世職○乙卯山東巡撫丁寶楨奏連日勦賊獲勝暨
修築馬賴河牆漸可竣工得旨高唐一帶河牆該撫當嚴飭地方
官督率紳團趕緊興築完固水師礮船見已駛赴臨清著丁寶楨
卽飭帶兵員弁駛赴運河下游歸李鴻章調遣○予山東陣亡副
將王福田祭葬世職○丙辰諭軍機大臣等庫克吉泰劉典奏北
路官軍勦賊獲勝移營進偪城根見督軍力籌勦洗並三水邠州
等處勦賊疊勝情形各摺片白水澄城一帶疊經官兵接勦已無
賊蹤其盤踞雲巖嶺之賊經知縣余觀瑞隨同劉厚基等所部分
路進攻連破賊卡木城直偪城根逆首袁大魁率黨拌拒城難猝

下見已添兵圍攻雲巖鎮爲該逆老巢若能乘勢攻拔則宜川一路冀可肅清著庫克吉泰劉興卽飭劉端冕魏光燾等激勵士卒併力規取以期就地殲除毋稍鬆勁該處逼近黃河應如何添兵分扼之處並著隨時知照鄭敦謹妥爲辦理回匪紛竄三水邠州等處經提督高連陞等暨黃鼎各軍追擊頗有擒斬隴州火燒寨地方復有回逆土匪乘機擄掠總兵羅洪德先後督勇追殺賊眾敗走見在賊股盤踞正甯涇州甯州一帶涇州情形尤爲喫緊雷正綰雖由長武窰店前進兵力尙單著卽檄飭劉效忠迅率所部先顧涇城會合雷正綰一軍痛加勦洗並著飭令黃鼎相機夾擊迅殄逆氛將此由五百里各諭令知之○丁巳子四川殉難知縣瑛桂祭葬世職○戊午諭戶部撥銀二萬兩備巴里坤軍需○御史郭從矩奏請嚴禁山西種植罌粟允之○己未李鴻章奏郭松

林會同東軍王心安於五月二十九日由陵縣進至臨邑東南探賊竄往商河之李家坊三十日郭松林等軍追及之擒斬百餘名賊奔惠民一帶郭松林王心安李長樂等分路追襲奪回賊踞村莊十餘處將賊衝爲兩起一竄東北一竄正北郭松林與東軍向正北疾追七八十里沿途賊棄幼孩羸馬及脅從難民甚多直抵樂陵之劉村擒獲千餘名李長樂擒獲張總愚之姪張七等於軍前正法其竄東北一股經張曜宋慶督隊由樂陵東進擊敗之擒斬甚夥六月初三日郭松林督隊向東北進追探賊合股竄陽信之清豐鎮聞我軍至又折而南初四日由武定之杜家橋竄過徒駭河郭松林卽緊躡過河該逆竄至濱州十八里之李子鎮圍攻民寨郭松林督軍猛壓而前賊遽驚遁馬隊盡力衝突得保民寨三處斃賊數百名郭松林乘勝急追賊又折竄西北是日潘鼎新

亦由陽信南來遂與郭松林會剿初五日賊方西遁已刻追及

馬店迤南賊被追窘迫拌死回拒鼎軍馬步各隊連環並進郭松林督唐仁廉等馬隊從右路鈔出賊後李長樂等步隊繼之賊屢回關悉經擊敗我軍直追四十里至商河東北之于家圩賊仍乘閒回撲復經胡良作馬隊截擊生擒悍逆百餘名各軍乘勝合追至晚收隊是日計斃賊千餘名賊目陳信元帶騎賊數十人乘夜來降潘鼎新收撫之該逆旋在沙河左近盤踞初七日黎明郭松林潘鼎新冒雨潛師襲其不備前後夾擊泥淖載塗賊騎難於馳突不得不拌命抗拒我軍無不以一當百奮勇爭先賊大潰挫我軍壓追三十餘里伏屍遍野直抵商河城下沿途敗賊竄匿秫叢樹林閒其大股脫逃者約五千餘騎郭松林所部馬隊統領提督胡良作鼎軍步隊統領提督潘國揚均受重傷是役陣斬槍斃及

擊散逆眾約二三千人生擒千餘名實爲非常快戰臣查擒逆屢挫之餘勢極窮蹙裹脅人馬拋棄殆盡惟其百戰死黨敗輒騎駿馬先奔秫苗樹林隨處遁匿忽散忽合每爲困獸之鬪臣初患賊多難制今更患賊少難滅惟有恪遵諭旨徧貼解散告示密布閒謀懸立重賞使之擒殺逆首離其心腹並飭郭松林等仍會合皖豫東軍乘勝相機兜追輪替進擊勿任喘息冀可早日蕆事近值三伏炎蒸暑雨載塗軍士用命爭先殊堪嘉憫所有追剿尤爲出力各員分別懇恩獎敘以昭激勵再六月初旬黃河伏汛斗漲黃翼升歐陽利見姚廣武等各督所部礮船陸續由張秋駛入德州運河北路運防得此聲援尙臻穩固臣會商黃翼升卽酌帶船隻周歷東光南皮以下察看形勢分布策應又奏正緒摺間接潘鼎新函報據獲賊供初七日商河之戰逆首張總愚自帶黑旗隊衝

陣被我軍槍傷落馬槍子洞穿背腹賊以數十騎扛之而逃羣賊立時紛潰等語查張總愚受傷既重似無生理據郭松林函報亦稱是日賊眾潰亂非從前敗狀可比若張總愚傷重致斃餘黨必卽瓦解見飭該統領等趕緊會合兜剿以期一鼓殲除 上諭軍機大臣等英翰奏飭軍兜剿賊匪並派水師扼紮防運一摺捻逆因陵縣臨邑一帶添築長牆折向東北英翰見復添派馬隊令與張得勝程文炳等會合淮東各軍隨地兜剿著卽檄飭該將士等盡力追截並著都興阿親赴前敵督率各軍實力兜剿左宗棠李鴻章嚴飭各將領與英翰丁寶楨所部諸營聯絡聲勢合力截擊以期就地殲除賊匪被剿情急勢必拚死搶撲運河減河上游一帶形勢散漫兵力空虛民團亦甚稀少最爲可慮左宗棠李鴻章尤當檄飭諸軍隨地遮護毋任竄近河岸其減河下游近海一帶

河防都興阿崇厚亦當加意嚴防毋稍疏懈賊蹤剽疾異常趨向
靡定西南馬頰河長牆並臨清東昌等處運防仍著李鴻章英翰
丁寶楨實力防守不可因踞賊尙遠稍涉大意黃運兩河見值水
勢盛漲余先元等水師礮船均已駛抵臨清英翰見飭令余先元
等分駐臨清以北之油坊鎮等處著卽飭令認真梭巡並與北路
水師互相聯絡黃翼升姚廣武及直隸西路水軍均已由臨清北
上著李鴻章妥籌分布本日復據李鴻章馳奏官軍疊獲大勝並
張總愚受傷情形各摺片賊匪屢經敗挫勢頗窮蹙見在首逆被
傷賊情渙散官軍正可乘此機會盡力勦洗著都興阿等激勵將
士趕緊將此股殄滅淨盡毋畱餘孽前據都興阿奏稱賊眾多有
薙髮希圖裝扮官軍遁迹渡運之事雖不可信爲確實而賊情詭
譎亦屬事所應有該逆雖被官軍槍子洞穿背腹生死尙未可定

見在下落如何並著李鴻章確實查明具奏仍著都興阿左宗棠
李鴻章崇厚等督飭沿河兵團嚴加盤查毋令該逆改裝潛迹潛
渡運西致令漏網英翰丁寶楨亦當督飭官軍並各處鄉團一律
嚴加盤察毋稍大意黃翼升等水師已抵東光卽著李鴻章飭令
該提督酌帶師船駛赴南皮東光以下梭織巡防俾河防益臻周
密將此由六百里各諭令知之○辛酉諭軍機大臣等工部奏請
飭各省欠解硝斤一摺直隸等省欠解硝斤爲數甚鉅經工部屢
次催解該督撫置若罔聞殊屬延玩所有直隸河南山東承辦硝
斤各員著吏部查取職名先行交部議處見在軍務未平硝斤需
用甚多而工部火藥局不敷支放所有直隸欠解淨硝五十七萬
九千五百餘斤河南欠解淨硝五十六萬九千九百餘斤山東欠
解淨硝五十六萬斤著官文李鶴年丁寶楨迅卽埽數起解毋得

再有遲誤儻如前玩忽延不報解必將該督撫等從重懲處將此各諭令知之○諭蘇鳳文奏官軍剿賊疊勝收復歸順州城並派員赴楚採辦軍火蘇鳳文馮子材奏太郡官軍追剿叛匪獲勝各摺片歸順一州地處粵西極邊逆匪吳亞終逃逸後其黨黃宗漢等負險抗拒經道員覃遠璉調派張友田馬正龍各軍連番剿擊逆黨就殲馬正龍等分攻州城隔平城外各賊營壘當將州城收復逃匪悉爲官軍所殺惟新墟一帶餘匪俱向三台山舊巢竄去仍著蘇鳳文檄飭覃遠璉督率將士乘此聲威迅圖掃蕩以清邊圉軍火爲攻剿要需該省既乏硝磺自不得不向鄰省商辦蘇鳳文見派員前赴衡州永州永州寶慶三府屬採買軍火卽著劉崐迅飭各該地方官幫同粵省委員妥爲照料湖南爲產硝之區雖各省採辦過多究非若粵西之缺乏劉崐務當設法通融毋得稍存畛

域蘇鳳文亦當札知派往各員遵照所給印票採辦不准私運數
浮致滋弊混逆匪吳亞終勾結粵南弄匡匪徒同攻洛陽九葑等
處經副將謝繼貴等督帶兵練會合夷兵分路夾擊斬獲甚多立
解九葑洛陽之圍剿辦尙爲迅速並據獲賊供吳亞終欲分襲龍
州下凍逐卜等處牽掣官兵卽著蘇鳳文馮子材嚴飭羅文福實
力防堵並令太平府各屬文武將逐卜一路隘口嚴加扼守以遏
賊蹤一面札飭太平府知會越南國吏官及各路文武員弁會合
剿擊殲厥渠魁毋任日久蔓延頻煩兵力昨據御史郭從矩奏請
飭臬司赴任等語新任山西按察使蔣益澧續假計又期滿該省
防剿需人著劉崐傳知臬司趕緊起程赴任毋再遷延將此由五
百里各諭令知之○壬戌諭軍機大臣等劉嶽昭岑毓英奏省外
官軍歷次剿匪獲勝各情形一摺岑毓英由曲靖赴援省城於宜

夏七旬一帶進攻連破大小石壩等賊營二十餘處並攻克小板營賊壘三座收復官渡水寺等民堡其分攻呈貢晉甯等州縣之軍亦將賊兵擊敗攻拔金馬寺等處賊巢十餘處進紮大樹營疏通省城糧路逆黨復由邵甸糾合嵩尋之匪圍攻楊林官軍乘風縱火焚其木壘連破賊營礮樓並將官渡來撲之賊擊敗甸尾古城廠口等處賊壘亦經官軍分路攻克追敗焚掠九甲河賊眾拔海梗賊營一座其石虎岡等處踞壘並經官軍先後攻拔生擒偽大將軍李洪勳等正法呈貢城外賊營亦經官軍攻破見經合圍縣城滇省各路官兵自二月至閏四月屢獲勝仗剿辦甚屬得手見在賊勢漸蹙著劉嶽昭岑毓英激勵將士將屯踞省外賊匪速行剿洗以固省垣重地一面督飭各路官兵將尋甸等處股匪次第殲除所有歷次出力之文武兵勇均著劉嶽昭等於省城解回

後彙案請獎劉嶽昭另摺奏遞陳滇黔軍情吏治營務廢弛並開
練流弊一摺滇西逆黨眾多分路攻撲省垣擾及各府州縣紛至
沓來勢甚蔓延該督撫等當督率諸軍先清附省賊匪將新陷各
城以次收復爲進規迤西之計並將迤東完善各地方銅鹽稅課
妥爲籌辦以裕餉源簡委賢能牧令埽除積習以敦吏治並將潛
冒文武各委員一體裁撤以清積弊其跋扈不馴之滇黔各團首
均著劉嶽昭岑毓英曾璧光次第懲辦檄令各歸地方官督理嚴
懲大團首私行仇殺干預公事舊弊以杜亂源黔省各路援剿之
川湘各軍著崇實劉崐卽檄令統帶各員歸曾璧光節制以一事
權各該營餉需仍著崇實劉崐源源接濟不得視同膜外滇黔需
餉孔亟所有應經部撥各省並各關協濟餉銀著戶部行文各該
省督撫並各該關監督嚴行催解毋任視爲具文另片奏岑毓英

等進攻楊林受傷情形等語岑毓英臨陣打仗身受槍傷奮勇可
嘉見在調理當已痊愈著劉嶽昭隨時馳奏以慰廬繫將此由六
百里各諭令知之○予雲南陣亡遊擊楊文忻祭葬世職○癸亥
諭軍機大臣等富明阿等奏截剿竄匪獲勝並與俄國會議情形
一摺俄界挖金匪人滋事竄入甯古塔界經富明阿派兵迎剿將
匪黨殲戮殆盡並生擒匪首石才等三名在逃餘匪雖僅止三四
十名匪入深林難保不餘燼復然著富明阿等卽飭令派出官兵
實力搜捕不准一名漏網以清邊境烏勒興阿見赴摩闊歲地方
與俄官辯論邊境交涉事務並會議見辦事宜五條尙屬妥協著
俄人聲覆後奏明辦理所有此次剿匪出力之官弁兵丁准其俟
邊界會議事竣餘匪剿辦肅清後彙案保獎所陳分界圖說一併
畱中備覽將此由五百里諭令知之○甲子李鴻章奏賊股敗衄

後由商河遁入濟陽東北黃河沿之鄧家渡龍王廟一帶連日大雨滂沱平地水深二三尺徒駭河與黃河水勢增添賊所踞處地形略高以外一片水窪潘鼎新吳長慶由米家橋進張曜宋慶由林家橋進袁保恆郭松林會同皖軍張得勝程文炳東軍王心安由多石橋進皆由徒駭河北岸晷渡而前冀蹙之水濱爲一鼓殲殲之計頃據袁保恆潘鼎新馳報我軍搜捕散匿之賊疊有斬獲張曜宋慶於六月十一日帶隊先至林家橋繞出賊前攔擊已獲大勝郭松林潘鼎新張得勝程文炳等均乘夜進兵兜追又據潘鼎新十三日函稟據獲賊供稱張總愚自初七日受傷後甚爲窮迫徒駭河沿岸村莊見有縊死長髮老賊並自燒馬匹者其慌亂情形可想臣飛飭各統領乘此賊勢窘蹙合力兜剿趕緊窮追務期悉數殄除勿畱餘孽劉銘傳於六月初八日行抵東昌銘軍老

營昨來德州晤商機宜已檄調該提督原部馬隊並酌抽銘軍步隊由劉銘傳統率卽日馳赴前敵相機督戰其圍堵蕩上諭軍機大臣等捻逆經官軍擊敗後遁入濟陽潘鼎新等會軍進剿劉銘傳見亦回營經該大臣飭赴前敵卽著李鴻章嚴飭劉銘傳會合諸軍乘此聲勢窮蹙之時加勁追剿悉數殲除毋畱餘孽並著左宗棠英翰丁寶楨嚴防運河毋任該逆得以偷渡儻有賊匪竄近卽行派兵截擊鹽山慶雲見在有無捻蹤該捻見分幾股並著都興阿左宗棠李鴻章崇厚確切查明如鹽山等處尙有分股卽著都興阿就近痛剿毋任漏網將此由六百里各諭令知之○諭庫克吉泰劉典奏官軍攻克雲巖鎮賊巢生擒賊目餘黨殲除淨盡一摺逆匪袁大魁等竄踞宜川之雲巖鎮一城兩堡均極堅固知縣余觀瑞疊次環攻該逆恃險抗拒復經道員魏光燾會同劉

端冕等分投進擊拔椿墳濠將雲巖鎮城克復其踞寨之匪亦卽
開門乞降逆目張大有等均經訊明正法惟據奏賊目袁大魁投
井溺斃又稱乘人眾擁擠時獨自潛逃該逆屍身既未撈獲難保
非乘隙遠颺冀逃顯戮仍著庫克吉泰劉典責令附近各地方文
武明查暗訪總期得有實據毋任餘孽復萌該處新經克復百姓
困苦異常並著飭令余觀瑞加意拊循將飢民等妥爲安插以蘇
民氣涇州長武等處賊勢鴟張庫克吉泰劉典務當乘此得手之
時分撥勁軍會同該處在事將士迅圖掃蕩用竟全功將此由五
百里各諭令知之○丙寅諭軍機大臣等富明阿等奏防兵需餉
孔亟請開墾圍荒繪圖呈覽一摺吉林防兵常川操演餉項支絀
所稱墾荒各節業據派員確切查勘繪圖貼說尙屬詳明約計可
墾之地共得二萬晌有奇旣係光山無樹藏牲且可於荒溝河南

原有圍場附近處所另覓圍場不礙虞獵自無妨通融辦理著富
明阿等詳慎妥商毋滋流弊並不准再行開闢以示限制至直隸
山東等省逃往吉林難民尤須隨時稽查妥籌安插免貽後患圖
一件畱覽將此諭令知之○李鴻章奏賊由商河敗遁濟陽以北
之鄆家渡曲里集一帶張曜宋慶與潘鼎新面商擬繞向賊北面
進剿六月十一日行抵郭橋柳橋二更時該逆由東南竄至宋慶
飭李承先率隊過河迎剿踏毀賊踞村莊兩處擒斬二百餘名該
逆連夜向北狂奔宋慶督隊且攔且追張曜亦乘夜由新橋過河
截剿十二日抵崔家寨馬莊擒斬二三百名該逆遺折而南撲入
黃河沿之老海窪鳧水向正東逃竄宋慶等亦分路鳧渡追剿張
逆竄過老海窪卽循黃河向東北竄去適與張曜相值張曜迎頭
剿殺匪勢不支敗回西南仍循河遁走宋慶馳抵河沿將該逆截

住賊復大敗張曜仍帶隊截堵該逆慌亂無路徑撲玉林鎮鴻福寺該處四面皆水官軍殺入賊匪投水死者坑溝俱滿宋慶所部生擒僞天將何洗俊並擊斃花旗著名賊首楊恩楊照悍酋張元等張曜所部擊斃著名賊首程二老砍程三老砍張錦泗周六均已查獲賊屍確實無訛大小賊目死者甚眾計是役擒斬淹斃賊夥約六七千名獲瀛馬近萬匹該匪軍械輜重拋棄殆盡宋慶所部傷亡勇丁三百餘名張曜傷弁勇五十餘名是日賊沿徒駭河西南走適郭松林與東軍王心安皖軍張得勝程文炳先後由多石橋兜進十三日賊眾闖至擊斃無數賊由西竄郭松林等跟蹤向西追剿其正東一路張得勝先遇賊接仗擒眾驚竄闖至程文炳隊內奮力轟擊斃賊甚多十四日各軍追過多石橋西賊復折而北向由王莊搶渡徒駭河郭松林張得勝等趕至獲落後馬賊

數十名賊奔臨邑東北是日善慶溫德勒克西由臨邑拔隊南進半途邀擊頗有擒斬臣又先派周盛傳吳長慶兩軍由德州吳橋分路南下以備夾擊吳長慶十四日起至距臨邑三十里暫駐探賊北來十五日冒雨橫出德平交界之美鎮殺賊數十名生擒百餘名賊卽敗退十六日巳刻賊由德平甯津之交越吳橋而至德州之桑園吳長慶尙畱二成隊在桑園防守運河聞賊北竄甚急亦由德平連夜隨賊而北賊甫離桑園六七里營內小隊突出攔剿賊不知我軍多少折向西北撲竄運河有騎賊二十餘名先到高家店渡口冒充官兵喚渡經西岸守牆民團及提督徐道奎所部師船開礮奮擊斃賊數十名吳長慶復派隊在後追擊擒賊百餘賊始潰退午後復往德州以北之第二屯老君堂一帶搶渡又經礮船擊走臣在德州聞信派總兵歐陽利見鄧萬林各帶礮船

下駛接應臬司張樹聲道員李逢春等飛調景州民團全隊上牆堵擊該逆在河東岸上下數十里盤旋竟夕周盛傳吳長慶督隊由東北兜追臣派親兵小隊道員周世臣總兵張樹屏由德州夾攻劉銘傳復調銘軍馬隊乘夜進襲是夜周盛傳攻破賊踞村莊數處收降賊目張九臨數百人周世臣等收降賊目張政綱張政位張可師尹瑞城等六百餘人銘軍馬隊收降邱麻子夥賊二百餘人周盛波收降李老懷夥賊八百餘人臣因其窮蹙乞命分別遣畱十七日餘眾仍向德平一帶竄遁周盛波周盛傳郭松林張得勝等分路緊追臣親訊降目僉供張總愚前此受傷實不致命昨至運河邊猶首先策馬下河奈水深湍急礮子如雨眾賊畏阻不從張逆欲自尋死經其兄張總導勸阻痛哭而返眾賊見運河不能搶過官軍勢盛內生攜貳是夜先後赴臣營乞降者二千餘

人見計該逆死黨惟存張總導張總先張政江數隊皆其親屬人愈少則糾結愈固張總愚決意避兵亂竄自稱走一日卽活一日各軍追剿若不趁此地勢及另圖內閒似尙非一二仗可了惟有及時相機圖之冀速殲滅張曜朱慶轉戰日久軍士勞苦倍常此次出奇兜剿竭一晝夜之力出入泥淖中獲此大捷所有尤爲出力各員籲懇 聖慈准照所請給予優獎俾作士氣至防守運河水陸各營及西岸景州紳團協力堵剿擊退悍逆可否由 臣 查明出力員弁彙案請獎出自恩施 上諭英翰奏賊竄濟陽抽撥防兵會剿丁寶楨奏東軍連獲大勝並團勇擊退竄賊情形各一摺昨據李鴻章奏徒駭河與黃河水勢增漲賊營以外一片水窪官軍分路進剿已獲大勝見在賊勢甚蹙正可乘此機會迅圖殄滅之計英翰見復添派總兵奎光帶領所部馬隊並於運河防軍內

抽撥三千人令奎光帶赴濟陽一帶著卽飭令會合張得勝等軍
實力進剿並著丁寶楨檄飭東軍併力合擊一面鼓勵團勇並黃
河礮船嚴密防守李鴻章督飭前敵各營會合東皖豫各軍四面
兜剿務期就地殲除都興阿遵奉前旨如鹽山等處探有分股卽
著就近痛剿左宗棠崇厚仍須嚴扼運河及減河一帶以防竄撲
毋稍疏虞英翰所奏本月初二三日後陳國瑞隊伍潰逃該侍衛
不知下落同日據丁寶楨奏初四至初七等日戰事陳國瑞軍在
武定商河等處剿賊屢有斬擒是潰勇等所供未可憑信著都興
阿李鴻章英翰檄飭該侍衛於所部勇丁妥爲駕馭會合各軍迅
速滅賊英翰另片奏請將程文炳開副將底缺並將副將黃鳴鐸
以原品休致等語均著照所請行程文炳仍著記名以提督遇缺
儘先提奏本日復據李鴻章奏連日獲勝並擊退搶渡運河逆匪

都興阿奏察看河防並擬挑兵渡河會剿各一摺官軍在濟陽東北會合攻剿破毀玉林鎮鴻福寺等處賊巢追至黃河沿老海窪一帶循河剿殺疊獲大勝賊復由德平甯津越過吳橋於德州桑園高家店等處搶渡先後經廠船團勇及李鴻章由德州派往之隊會合截剿將賊股擊退疊次擒斬及收降賊匪甚多並嚴懲著名逆目多名該逆敗殘已極著李鴻章等激勵將士乘勢痛剿或另圖內間將此股殄滅淨盡毋畱餘孽西北一帶運河防堵最關緊要左宗棠見駐吳橋兵力較單務當振刷精神力籌堵禦李鴻章尤當於德州一帶加意防河毋任一騎竄渡致成不了之局並著都興阿將所部各營迅速挑選抽撥得力之軍渡河會剿不可仍前延玩自干咎戾減河防務仍著會商崇厚妥爲兼顧楊鼎勳在營病故殊堪憫惜著李鴻章奏請優卹都興阿見派王萬釗暫

統所部防河能否勝任仍著李鴻章查奏春壽呈報勝仗情形與
春山等所稟各異而所部將士傷亡頗多有無捏飾仍著都興阿
確查參奏將此由六百里各諭令知之○予山東陣亡遊擊王林
祭葬世職○戊辰左宗棠奏劉松山郭運昌等駐軍甯津迤東偵
知賊由商河北竄六月十五夜已抵甯津正南西南孫家集趙家
莊尙家莊一帶劉松山等令軍士捲旗疾追五鼓逼近賊巢分路
並進縱橫盪決賊眾紛紛潰竄斬獲甚多正追殺間有賊目張大
幅率張五孩舊黨七百餘人下馬乞降劉松山等受之挑其健者
隨行餘均解赴甯津聽候發落追殺二十里有賊目洪瞬淋率馬
賊百餘伏地乞降受之復整隊追至吳橋探報張總愚正噉諸賊
向桑園渡口撲渡劉松山等派隊兜剿賊已經西岸官軍及礮船
轟退聞後路官軍又至遂折而南竄劉松山等於十六夜復各率

所部追之前後兩日夜共斃悍賊一千三四百名生擒六百餘名受降賊目除張大幅洪瞬淋外據郭運昌稟賊目張瀛超率黨四百九十七名魯克桂及其子魯全春亦率黨數百名赴營乞撫又有賊目周六焦仲赴營自稱有眾三千乞撫聞劉松山十六夜出隊時有賊目率黨二千乞撫之事尙未接其稟報臣當賊蹤竄至吳橋村派隊截勦沿途亦技獲逸賊百餘斬賊目徐侍華等九名均從逆多年髮長尺許者餘並分別安置擬俟事定按名遞籍降人中如有兇悍嗜亂者亦斷不令其倖免刑誅致貽後患據各賊供張總愚並無帶傷亦無薙髮之事近因黨與離心各思就撫憂懼無措此次折竄西北本圖由東光泊頭一帶猛撲運河經老湘卓勝等營衝擊始掣隊徑向西竄賊數存者不過數千臣仍飭劉松山郭運昌等乘勝窮追誓滅此賊適黃運大漲賊路愈窮以理

勢論可期迅速釐事此次劉松山所部副將雷致祥遊擊江春生血戰捐軀應請旨交部從優議卹以慰忠魂英翰奏張得勝程文炳各軍於六月十三日會合郭松林由多石橋進剿斃賊千餘收降擒首楊榮桂吳得名陳麻等數百人逆首程二老砍張政江楊識等同時爲各軍所偏皆投水而死該逆大潰僅餘敗賊數千人向北狂竄我軍連夜緊躡疊有斬獲十五日追至德平西南殺賊數百又收降擒目韓洛華韓萬等三百餘人挑選精壯分隸我軍隨同進剿仍一面拔隊會同郭松林等儘力窮追據擒賊並降人供張總愚存亡雖未的確而此股敗賊係張總導張政綁等糾領堅欲撲渡運河等語查該逆經各軍奮力合擊殲斃解散以數千計敗賊漏網之餘妄冀暫延殘喘臣已飛檄張得勝程文炳等合力猛攻務令悉數殲除不留餘孽仍親督運防上下一帶將士嚴

益加嚴以期有備無患 上諭軍機大臣等捻逆由商河北竄經
劉松山等截擊大獲勝仗逆目張大幅等先後乞降見在酌量辦
理該逆等窮蹙來歸自應分別遣畱妥爲安插以孤賊勢英翰此
次收降逆首楊榮桂等妥爲鈴束挑選精壯用作先鋒使之效力
行閒不至再生反側惟左宗棠摺內前稱賊目洪順林後又稱洪
沅林是否卽係一人著查明覆奏逆賊周六焦仲有眾三千赴郭
運昌營乞撫十六日夜又有賊目率眾二千赴劉松山營乞撫之
事郭運昌等見在已否收降作何安置著左宗棠查明一併覆奏
並著該大臣督撫等嚴飭各將領遇有乞撫之眾務須悉心稽察
妥爲鈴制賊黨業已離散必不能久張總愚雖未得確耗而其勢
已孤著該大臣督撫等遵照前旨出示懸賞使之互相疑貳張總
愚係著名逆首荼毒生靈重煩兵力諒該大臣督撫等同深憤怒

斷不任其漏網卽著嚴飭各軍加緊追剿俾得剋日殲除以慰庶
繫將此由六百里各諭令知之○予山東陣亡副將雷致祥遊擊
江春生祭葬世職○庚午諭軍機大臣等李鶴年奏豫軍剿賊疊
獲大勝懇將出力員弁獎勵一摺據稱本月初七日至十二等日
豫軍追賊至郭橋柳橋並崔寨老海窪一帶接仗疊勝及玉林鎮
鴻福寺大捷情形與李鴻章前奏大略相同宋慶張曜前由豫省
督軍赴直剿賊頗爲出力此次追賊直東疊獲勝仗並於玉林鎮
鴻福寺痛剿賊匪尤屬奮勇可嘉所有出力各員前據李鴻章擇
尤保奏已明降諭旨照請獎敘此次李鶴年所保各員有李鴻章
前摺未經保獎者卽著該撫咨明李鴻章彙案保獎以歸畫一前
據李鴻章奏稱逆首張總愚竄至吳橋德州首先搶渡運河爲礮
船及對岸民團擊退復被官軍追擊折向德平竄逸是張總愚在

玉林鎮投入黃河之說尙未的確該撫仍當檄飭豫軍將張總愚
擒斬不得稍涉大意另片奏豫省水師礮船駛赴東昌等語著李
鶴年卽飭管帶礮船統領與馬德昭防軍水陸援應互相聯絡以
固河防將此由六百里諭令知之○以黃河盛漲諭李鴻章撥銀
九萬兩交蘇廷魁備修防○辛未李鴻章奏六月十七日賊由德
州陵縣境內逃竄周盛波帶馬步小隊橫出韋家寨突擊之賊駭
而奔吳長慶派馬隊三營緊躡賊後皖軍程文炳亦督隊繼至張
總愚整隊回拒吳長慶伏軍齊出斃賊無數賊向東南奔竄郭松
林追抵陵縣先後收降賊目王有志羅志汝等三百餘騎十八日
會同善慶等追至林古莊接殺百餘賊是夜有賊酋張小辯子帶
二百餘騎來降十九日張得勝程文炳追至商河西遇賊於兩湖
之濱張逆率眾拒敵程文炳馬步涉水進戰殺賊二百餘名收降

百餘名賊又折走東北袁保恆帶小隊進至德平之義渡口派魏林起馬隊探賊沿途擒獲騎賊數十人訊稱張總愚所部各頭目大半投降僅贖張總導張總先等兄弟相隨賊黨精悍無多等語又據侍衛陳國瑞呈稱十二日戰於濟陽之高橋擒賊百餘十三日偽淮王邱遠才率八百餘騎來降該侍衛令其帶罪立功見已向東北追剿近日黃水盛漲灌入運河德州東光南皮境內東岸衝塌三處運水由平地漫溢入海足阻東北一帶賊騎追軍就地蹙剿更易得勢劉銘傳抽調馬步漸齊卽日進兵會合各軍兜擊得旨著懌遵疊次諭旨督飭各將士乘此聲勢力圖剿洗以竟全功逆首張總愚悍竄無多務須悉數殲擒毋任逃竄○千軍營病故湖南提督楊鼎勳祭葬卹廕諡忠勤交國史館立傳並於江蘇福建山東等省立功地方建祠○壬申諭軍機大臣等官文奏運

西勇團師船擊退逆酋見飭加意嚴防一摺捻逆被通東各軍疊次剿敗亟思竄渡運西經臬司張樹聲等督率勇團會同師船奮力擊退不令該逆得以西竄辦理尙屬奮勉但恐該逆被剿窮蹙仍圖竄逸著官文督飭張樹聲等激勵勇團加意防守毋任偷渡致滋延蔓本日據給事中夏獻馨奏京東灤州等處有賭匪倡立花會愚民被其引誘每於夜間聚會附近十餘里村莊男婦相率猜賭請飭查禁等語匪徒聚賭最爲閭閻之害花會名目尤干例禁當此捻逆未平京東一帶盜風尙熾亟應嚴行查禁著官文飭令該管地方官嚴行查辦不准虛應故事務使賭風歛迹不至別生事端是爲至要原片著鈔給閱看將此諭令知之○癸酉諭軍機大臣等岑毓英奏旋抵省營分布防剿情形並請催四川等省迅撥協餉各摺片岑毓英以回匪分竄邵甸欲糾合各逆阻截省

東糧運因於五月十四日馳回省營相機辦理並派同知岑毓英等分路進剿見在新興州之後裕鄉已經收復又攻克呈貢縣之小古城等處賊壘直薄城下一俟呈貢甯甯得手卽分軍進逼昆明以解省城之圍籌辦尙合機宜著劉嶽昭岑毓英激勵將士分道進剿速將屯踞省外賊匪全行剿洗以固省垣重地其省內防守事宜並檄飭在城司道等盡心守禦以維大局該省餉需久絀亟須各省接濟著崇實瑞麟李瀚章劉坤一各查照張凱嵩及劉嶽昭在巡撫任內先後奏准部撥協濟滇餉迅速如數籌畫兌交滇省提餉委員星馳解往以資接濟將此由五百里各諭令知之

○乙亥以孟秋時享

太廟

上前期親詣行禮

○左宗棠奏查

劉松山郭運昌馬步各軍六月十六日在甯津吳橋獲勝後十七日五鼓出隊追賊適賊目楊松茂率騎賊及被脅難民伏道乞撫

劉松山受之簡其能戰者三百餘騎隨行餘委將弁送回甯津分別安置申刻追及賊之尾隊營總余虎恩率馬隊馳入賊中衝殺賊掣隊紛撲余虎恩被圍甚急劉松山等大隊馳至擊斃賊百餘名賊遂向德平一路奔竄十九日追至德平屬之周家莊忽報賊竄商河劉松山知其欲誘官軍南趨仍由東北逸出也屬郭運昌率所部回甯津扼之二十日劉松山富珠哩訥蘇肯各率所部向東北前進抵樂陵之程家莊適與賊遇賊向北飛奔官軍猛蹙之擒斬二百餘名是夜抵鹽山縣之張家村偵知賊聚保和寨劉松山潛師疾進賊眾倉皇失措未及成列官軍衝殺賊屍枕藉寨內逃竄不及者盡殲之賊大股向西敗竄其衝斷各小股分竄正北及西北西南維時月明如晝官軍分路縱擊搜斬稊叢伏賊百餘名比及天明北竄賊目周祿帶騎賊二百餘名馳回乞降劉松山

受之仍整隊向西追擊訶賊竄抵陳古村張村劉松山等各率所部急進張村之賊向西南竄走陳古村之賊因隔一港未及合併截殺略盡其斃賊千餘名生擒賊目李秀春成大義陳原亭等及餘賊三百五十名正法見在敗殘之賊不過二三千人能戰者不滿千人兼多軍械不全首逆張總愚屢次求死爲其黨勸止逆勢窮蹙已極臣以張曜宋慶陳國瑞等軍接續南追南路兵力旣厚目前黃運交漲賊之去路已窮必仍折而北竄飭劉松山郭運昌於德平樂陵一帶相機兜剿並以連鎮迤北運流東漫防務稍鬆復飭臣親軍各營一駐甯津之大柳一駐吳橋之梁家集以防漏逸臣仍率親軍千餘駐連鎮以顧運防其收撫降眾先後其計七千有奇挑其健壯者分置前敵疲困者暫畱老營至被擄孩童資送歸籍見刊護照路票兩種護照備給降眾路票備給難民大約

老弱疲乏者先予遣散健壯者俟事定後審編明白再行資遣回籍方期周妥此次力戰陣亡之守備張得升把總胡松林應懇天恩飭部從優議卹以慰忠魂 上諭軍機大臣等該逆敗殘之餘僅止二三千人能戰者不滿千人兼多軍械不全其窘蹙情形已可概見正宜乘此機會力圖殲滅著左宗棠李鴻章英翰丁寶楨會督諸軍合力兜剿務期及早殄滅以奏膚功賊匪被剿情急勢必乘隙圖竄運西左宗棠李鴻章當力籌扼截毋稍疏虞並著都興阿一面嚴顧運防一面督軍會剿崇厚亦當力籌軍火糧餉接濟都興阿軍營以應急需至各路軍營所收降眾惟有令在前敵殺賊如不肯盡力或與賊暗通消息著左宗棠等飭令前敵統將卽行正法沿河一帶防務見值喫緊之時不可將降眾錯置其間致貽後患該大臣等務須慎之又慎不得稍涉大意其給發照

票散遣老弱降眾難民一節亦宜詳慎辦理不可掉以輕心致令
奸匪涸迹渡河又形滋蔓將此由六百里各諭令知之○諭前因
林壽圖奏請裁撤西安糧臺當令左宗棠酌度具奏茲據左宗棠
奏稱西安所設甘肅後路糧臺原爲支應慶涇諸軍而設西安糧
臺一撤秦隴餉道中斷平慶涇固一帶實兩省孔道糧臺專設秦
安遠道轉輸亦有鞭長莫及之虞西安所設甘肅後路糧臺斷不
可撤等語左宗棠身任兼圻自應總權兩省通盤籌畫既據酌度
定議卽著林壽圖仍遵前旨將西安糧臺各事宜照舊妥爲經理
毋許推諉並著左宗棠隨時提撥協甘各餉通融接濟俾得餉項
有著克贍飢軍甘省荒瘠情形旣爲該大臣所深悉且見存兵數
尙有百四十餘營之多軍士待哺嗷嗷豈能枵腹荷戈雖先秦後
隴勢有固然而唇齒相依實爲安危所繫該大臣務當妥籌兼顧

以濟急需不可稍存歧視致虞譁潰山西原協涇慶之餉著鄭敦
謹照舊撥西安糧臺以歸簡易穆圖善卽行轉飭林壽圖於協餉
到時隨時提撥以資接濟將此由六百里諭知左宗棠穆圖善鄭
敦謹並傳諭林壽圖知之○諭麟興榮全奏請飭撥兵催餉籌辦
烏科防務福濟錫綸奏布倫托海叛賊東擾情形各一摺布倫托
海起釁之由旣由李雲麟辦理不善所致又不能設法彈壓棄營
速走以致叛賊尋蹤東擾貽誤事機厥咎甚重本日已明降諭旨
將李雲麟先行革職交福濟錫綸確查據實參辦並將明瑤補授
布倫托海辦事大臣矣明瑤惟當振刷精神會同錫綸將布倫托
海應行事宜妥籌辦理不可畏難苟安致有貽誤棍噶扎勒參見
已帶兵進擄賊巢奮勇可嘉並著明瑤錫綸商同該呼圖克圖迅
速相機剿辦毋任蔓延其有被脅之人亦當分別解散以孤賊勢

該匪既有東竄之信科城防務實關緊要奎昌福濟務當先事圖維督率兵民嚴密固守並著調蒙古官兵協同防剿不可漫無布置麟興等請調直隸等處兵丁出關助剿此時內地沿邊一帶防剿正資兵力勢難抽調出關且亦緩不濟急其請飭催各省協餉三十萬兩著戶部查明應解新疆餉銀省分行知該督撫催令將欠解之款迅速籌解不得仍前延緩致誤大局烏城防守事宜著麟興榮全錦丕勒多爾濟就見有兵力認真籌辦毋稍大意奎昌等另摺奏車林多爾濟因病懇請開缺等語本日已明降諭旨准其開缺回旗調理該城一切事宜是否必應添設蒙古人員相助爲理著麟興奎昌福濟等詳細酌覈如必應添設卽著該將軍等酌保一二員候旨簡放將此由六百里各諭令知之○浙江海塘

工竣

秋七月丙子朔飭山東山西河南撥解新疆軍餉○英翰奏據張得勝程文炳等具報我軍自德平獲勝後會合淮東諸軍由德平甯津吳橋一路跟蹤而進疊有新獲六月十七日該逆搶撲運河經水軍擊退回竄德州東北爲我軍追及張得勝程文炳督率馬步直前擊之張逆糾眾來拒營官王心忠等奮勇衝入陣斬悍賊百數十名收降三百餘人其時郭松林郭運昌等軍亦趕到截殺賊向西南奔竄我軍追至商河之常莊該處河湖交錯賊遂阻湖爲固以大股分列湖邊抗拒我軍涉水而進馬步分三路衝擊程文炳與總兵李得勝直擣中堅張得勝率隊由湖西夾攻賊始奔潰乘勝掩殺殲斃悍賊六七百名收降捻目羅開詳等共三百人立將該逆衝爲三段一循湖向南奔竄一向西北奔竄爲淮東卓勝各軍所擊埽除殆盡惟餘張逆一股數千人奪路而奔二十三

日竄至臨邑適總兵奎光帶隊迎勦行至鄧莊遇賊奎光豫伏馬步各隊於西南兩面而自率大隊擊之張逆自帶馬賊直前猛撲副將陸鴻慶等下馬抵戰斃賊數百名正酣戰聞參將徐思祥等伏軍衝出將賊隊截分兩段大軍四面圍鈔該逆大敗狂奔我軍追殺二十餘里其斃賊七八百名生擒四百餘名收降二百餘名此次皖軍前截後追於溽暑苦雨中三獲全捷見在淮東皖豫及陳國瑞各軍均由東北兩路躡賊而進賊已竄至高唐一帶張得勝程文炳奎光等會合諸軍分道追擊據降賊供稱張逆所餘三四千人其中能戰者不過一二十千人逆目張總導受傷甚重該逆自知無路可逃惟冀搶撲運河希圖漏網等語臣見督沿運各軍加緊防範並飭催張得勝等儘力窮追務期迅殲首逆竟此全功報聞○丁丑以擒匪蕩平 上詣 慈安皇太后 慈禧皇太后

前賀捷○李鴻章奏各路官軍追剿張逆在鹽山滄州德平等處
屢次大捷賊勢衰蹙花旗頭目周祿羅大各率敗賊來降張逆向
博平清平一帶圖撲運河幸東昌臨清張秋牐河水深各營嚴守
賊不敢近又馬頰河黃水漫入先經臣與丁寶楨嚴飭該官紳於
河西北岸聯築長牆數百里足限戎馬臣派劉銘傳調齊馬步即
日進追六月二十五日劉銘傳郭松林由陵縣會師南追袁保恆
亦同往聯絡豫境各軍旋據郭松林劉銘傳二十八日午刻在荏
平縣之南鎮行陣中草書數百言專弁馳遞德州內稱二十七日
賊由博平向東昌迤南李海務竄撲河牆當經守軍擊退劉銘傳
等議於徒駭河沿河橋口紮住劉銘傳步隊由桃橋守至南鎮郭
松林步隊由桃橋守至博平袁保恆往博平約會宋慶張曜由博
平守至東昌將賊圍在徒駭黃運之間庶馬隊可就地兜逐二十

八日早賊由西向東回竄劉銘傳調集馬隊迎擊該逆且戰且走
追剿數里值郭松林東來馬步全軍攔住去路又兼河道分歧水
湍泥陷劉銘傳郭松林兩軍馬隊五六千人縱橫合擊大股賊匪
全數擒斬張總愚僅帶數十騎北逃馬勇追上聞該逆棄馬遁入
高粱叢中又聞有投水淹斃之說劉銘傳當派鄧長安率馬隊四
路兜尋尙未回報張總愚之愛子張葵兒被郭松林所部擒獲並
拏獲頭目甚多張總愚之姪張政江率數十騎逃至南鎮正遇劉
銘傳所派駱國忠左右兩軍堵住拏獲極多約共生擒老賊三四
千人餘經善慶溫德勒克西等軍追殺已盡各等語臣見派各路
官軍搜捕餘匪並令降賊素識張總愚面貌者懸立重賞四處購
求無論是死是生務得確實下落該逆本在運河圈套之內見在
河水極漲各處伏軍嚴密皆欲得而甘心斷不容其漏網張總愚

本有勢窮卽自尋死不肯顯受刑戮之說其投水淹斃似尙可信除俟有確實下落再行馳報外所有各軍出力人員及河防團練擬請飭下該統兵大臣及各督撫自行覈實保獎英翰奏連日各軍跟蹤追剿屢獲大勝見據張得勝程文炳等派弁馳報六月二十八日張逆竄至博平東南徒駭河邊經張得勝程文炳會同淮軍袁保恆劉銘傳郭松林潘鼎新暨豫東各軍四面進隊合力圍大獲全勝逆股三四千人除斬擒收降外其餘盡偪入河中淹斃全股撲滅淨盡逆首張總愚同時投水伏誅逆屍尙未尋獲等語聞信之下彌深忭舞此皆仰仗 聖主天威是以大功克定其連日戰事並查明逆屍容續行詳奏謹先將大概情形恭摺馳報上諭內閣本日據李鴻章英翰由六百里加緊馳奏官軍會剿捻逆全股蕩平大概情形各一摺覽奏甚爲欣慰前據李鴻章等

疊次奏報追剿逆匪賊勢窮蹙諭令各該大臣等迅速殲除茲據奏稱六月二十日提督劉松山督隊追至鹽山滄州等處截殺三四百名布政使潘鼎新提督郭松林張得勝侍衛陳國瑞會同追賊至德平等處降其逆首羅六郭松林等復會同都統善慶溫德勒克西追至商河該逆涉水向西南逃逸潘鼎新等仍復冒雨力追進至高唐該逆圖撲運河復經提督劉銘傳郭松林候補京堂袁保恆等聯絡豫皖各軍分段扼守二十八日早賊由西向東回竄劉銘傳調軍追殺適郭松林追賊東來攔截竄路縱橫合擊大股賊匪全數擒斬並擒獲張總愚之子張葵兒正法兼生擒各賊目多名計共生擒老賊三四人餘逆悉數殲除全股蕩平從此直隸山東河南各地方生民得以安業慶幸良深惟據稱張總愚投水淹斃逆屍尙未尋獲著李鴻章等查明張逆實在下落無論

生死務須得有確據並著督飭各軍搜捕餘匪總期盡絕根株以免後患李鴻章前因督軍赴援遲延並不能克期滅賊曾疊予懲處該大臣深知感畏奮勉督勦冒暑適征克奏膚功自應先予開復以彰勞勩李鴻章著先行賞還雙眼花翎黃馬褂騎都尉世職其疊次因勦捻不力降革各處分並著查明開復左宗棠縱賊出陝追勦尙屬迅速抵直隸後督軍截擊扼守運防亦頗嚴密著將該大臣疊次降革處分一並先行開復河南巡撫李鶴年前以防勦貽誤量予懲處惟該撫所派張曜宋慶兩軍勦賊甚爲得力該撫並督隊出境防堵亦能顧全大局李鶴年著先行開復革留處分並賞還頭品頂戴李鴻章等暨英翰丁寶楨等均俟一律具報肅清聽候恩旨所有疊次勦賊最爲出力之劉松山郭寶昌郭運昌宋慶張曜善慶溫德勒克西陳國瑞郭松林潘鼎新跟蹤追勦

歷時最久不解勞瘁甚可嘉尙劉銘傳甫經抵營雖於剿辦此股
擒匪戰績無多惟該提督前剿任賴各逆勤勞卓著此次帶隊會
剿蕩平醜類亦屬一體有功該都統提督等及所部馬步各隊出
力人員著各該大臣督撫等迅速查明覈實請獎以昭懋賞其餘
出力員弁亦著一併請獎毋許冒濫○諭本日據李鴻章馳奏官
軍追剿擒逆於六月二十八日在山東茌平南鎮一帶將逆匪張
總愚全股蕩平已明降諭旨宣示因思擒逆自上年冬間渡河北
犯擾及河南彰衛懷三府及直隸山東所屬各州縣凡賊蹂躪之
地焚燒擄掠慘不可言小民耕種失時流離轉徙各該處紳民猶
能集團修寨並隨同官軍築牆防運奮勇殺賊保衛地方朝廷於
矜憫之中尤深嘉尙除山西被擾各州縣應徵錢糧業經該撫奏
請蠲緩外其直隸山東河南被賊各州縣著各該督撫迅速查明

分別擾害輕重情形奏請蠲緩錢糧候旨施恩所有各處團練出力紳董人等亦著各該督撫等一併詳查奏請獎勵其禦賊被害者並著查明請卹○諭軍機大臣等李鴻章奏連日督軍追剿屢獲大捷西捻全股蕩平並飭各軍查明張總愚下落各摺片覽奏實深欣慰各路官軍追剿張逆至鹽山滄州及德平博平清平等處疊獲大捷逆目次第乞降大股賊匪全數擒斬惟逆首張總愚是否擊斃抑係淹死未據查明著李鴻章等督飭各軍嚴密按尋該逆無論生死是生總須訪查確實毋令渠魁漏網該逆之姪張正江亦尙無下落著一併查明具奏並著都興阿左宗棠李鴻章英翰丁寶楨飭令該將領等乘此聲威按捕餘匪務絕根株運河等處官軍團練並著都興阿左宗棠李鴻章官文崇厚英翰丁寶楨等責令各該兵團加意嚴防認真守禦且張總愚屢圖兇水偷

渡以求倖脫尤不可稍涉大意各營疊次收降甚眾該大臣督撫等當妥籌善策分別遣散並令將馬匹器械一律呈繳見在兵勇尙難遽撤至將來遣撤之時尤當分起撤回妥爲辦理斷不可吝惜小費就近在直東遣散以致滋生事端陳國瑞所收降人偽淮王邱元才諒卽係邱遠才卽著都興阿飭令該侍衛派隊將邱元才及該降眾送至英翰軍營交該署撫妥爲鈴束正在寄諭聞據英翰馳奏各軍偏賊於徒駭河大獲全勝首逆張總愚投水伏誅逆屍尙未尋獲等語仍著李鴻章等檄飭各軍會同搜捕務得確情是爲至要將此由六百里各諭令知之○諭本日據李鴻章奏捻逆蕩平已明降諭旨宣示並將該大臣等分別施恩矣惟此次各軍追剿陣斬各逆固多而窮蹙投降者亦復不少前據左宗棠奏稱該大臣收降已至七千餘名而李鴻章英翰各營所收亦不

下數千名此輩狼子野心富賊匪熾盛之時卽拌力抗拒官軍迨
勦敗之後始行乞降以冀免死恐日久故態復萌爲患無窮所有
收降各頭目著該大臣督撫等密爲察看其中厯次反覆及桀驁
不馴者卽予正法毋稍濡忍致滋後患其所帶降眾如實係竊脅
者量予遣散其餘亦當妥爲鈴束設法安插畿輔重地未可稍涉
疏略再煩兵力此次飭赴英翰軍營之降目邱元才並著英翰妥
爲辦理該署撫向來遇事尙有決斷諒不至爲所愚也將此由六
百里各密諭知之○諭劉岷奏苗股撲犯寨頭官軍疊擊獲勝並
分勦黎平思州竄苗情形暨請催江西協濟餉銀敕旨劉儀順昆
已逃逸各摺片席寶田一軍踴毀岑松等處賊卡逆首潘老冒等
聚踞聖洲經榮維善各軍分路攻擊疊將鬼總牛尾坡等處賊巢
焚毀淨盡其聚聚賊匪突由寨頭西山圖撲官軍營盤亦經謝蘭

階鄧子垣等督軍追勦斃賊甚多楚邊業已安謐惟貴東近楚苗
巢以寨頭爲最險自應於攻克後籌畫進兵卽著劉崐飭令葉兆
蘭等暫行駐紮寨頭遇賊卽擊毋棄前功席寶田業經給假兩月
並著飭知該臬司假滿後迅速回營以圖進取思南石阡一帶善
後事宜該撫務當檄令彭芝亮妥爲經理並派營分駐以資鎮撫
不准稍涉疏虞湖南餉需久形支絀前議由江西每月協濟銀一
萬八千兩藉資接濟見在李元度席寶田兩軍兵數有增無減需
餉尤亟著劉坤一將每月撥解李元度餉銀一萬八千兩改爲協
濟湖南援黔軍餉按月委員解往以贍軍食李元度假滿在卽著
劉崐傳知該臬司懷遵前旨挑帶勁旅趕緊赴滇勦賊毋許藉詞
逗畱教首劉儀順稔惡已深見雖將朱明月等先後擒斬而該逆
改裝遠颺其詭譎已可概見據奏年已昏耄不能爲禍將來第該

逆身爲教首狼子野心安知不復行煽惑見既逃入貴西麻哈州地境則自有蹤迹可尋仍著劉崐密飭各防將士隨時搜拏毋任元兇漏網將此由五百里各諭令知之○于貴州陣亡參將彭蓋勳等祭葬世職○戊寅諭軍機大臣等據李鴻章英翰馳奏捻股全數蕩平各摺當經諭令該大臣等並各該督撫按捕餘匪並確查張總愚下落具奏本日據丁寶楨馳奏淮東等軍剿賊屢勝並擒獲逆首各摺片王心安王正起等軍或緊躡賊蹤或在防迎剿並與淮皖豫各軍分路兜剿均屬奮勇其蒲臺利津等處之水陸兵團力扼賊匪未容搶渡亦屬出力該逆全股見已經各路官軍團剿殲戮淨盡淮據李鴻章英翰奏稱六月二十八日之戰張總愚尙未擒獲所稱投水淹斃之語亦未得有確據丁寶楨此次所稱二十八日在馮官屯地方將逆首張總愚並張總導擒獲是否

確實仍著李鴻章英翰丁寶楨詳細查明無論淹斃擒獲均須得有確據並著認真按捕不可稍有疏略該逆詭譎性成或恐薙髮改裝潛迹渡河竟至漏網李鴻章英翰丁寶楨固宜盡力按捕都興阿左宗棠官文崇厚亦宜督飭兵勇及各地地方鄉團一體嚴緝總當俟查明該逆首下落後方可將沿河兵團再行議撤毋得草率了事致貽後患將此由六百里各諭令知之○諭穆圖善奏派隊勦辦東南各匪及秦州土匪一摺土匪剛八卽張貴在靜甯州地方糾眾倡亂黨與至一萬餘人之多徼成各縣境界突有東來股匪滋擾糧道梗塞自應迅速勦辦以免蔓延穆圖善見已派令善山保傅先宗等分投勦洗著卽嚴飭該副都統等激勵將士實力奮擊以靖亂階徽城一帶回匪尙未踞有巢穴尤當乘此立足未定併力捕誅毋畱餘孽剛八雖係迫而爲盜而麇聚稱亂與回

匪等其被脅難民固不必概行誅戮該匪首甘心叛逆豈得曲從寬宥著穆圖善飭令派出各員分別妥慎辦理毋得將就了事貽患方來將此由五百里諭令知之○己卯諭內閣前因副都統春壽呈報勝仗情形多有隱飾諭令都興阿確查具奏茲據奏稱查明春壽前在海豐慶雲交界處所突遇大股馬賊接仗失利傷亡頗多捏報勝仗請旨懲辦等語齊齊哈爾副都統春壽以帶兵大員勦辦賊匪一切接仗情形自應據實呈報乃既不能奮勇殺賊又復捏詞稟報諱敗爲勝實屬可惡春壽著卽行革職毋庸畱營以昭炯戒其所部馬隊卽著飭令副都統富和等認真整頓並查明該營員等如有剋扣兵餉等事卽著從嚴參辦○庚辰英翰奏前據張得勝等具報張逆伏誅擒匪全股肅清當將大概情形先行馳奏查該逆先於六月二十二日竄至德平程文炳正由甯津

拔隊張得勝一軍已先抵德平探知該逆全股在距城一二里村莊暫息張得勝卽會同陳國瑞整隊迎擊該逆人馬正在覓食我軍乘其不備從中殺出擒賊數百名該逆四散奔逃張逆自帶悍賊向東狂竄張得勝會同陳國瑞分道躡追該逆拌命回撲我軍排壓而前且戰且進追奔三十里共斃賊四五百名二十三日賊竄臨邑卽遇總兵奎光攔擊大獲全勝維時張得勝程文炳已會合淮東豫各軍緊躡而進該逆自知無路可奔惟拌死向南狂竄臣派總兵徐登善已革道員張景渠帶隊赴魏家灣沿運河一帶探勦二十五日賊爲奎光馬步所偏由高唐竄至清平以南遇道員劉傳楨帶隊游巡出其不意斬擒百餘騎賊轉向西趨二十六日甫近魏家灣徐登善等分三路而出該逆不敢戀戰向北狂奔張從龍等復帶防軍攔腰擊之賊回竄東南我軍兩面夾攻又獲

大勝同時淮東各軍沿路追殺擒斬收降者不計其數張逆僅餘死黨踉蹌南遁竄過徒駭河向杜平一帶奔逃二十七日淮東豫皖各軍齊抵徒駭河見賊麕集於一隅之地該處三面皆水東面八九十里南北僅四十餘里正值黃水泛漲平地一片汪洋該逆已入絕地斷難竄越張得勝等三路齊進一面撥雷隊伍扼守徒駭河阻其北竄一面於各軍挑選精銳馬隊分道進攻皖軍由吉家橋進淮軍由王家橋進東軍由陳家西橋進賊正盤踞高阜一見我軍趕到倉皇失措張得勝等直前進擊而以降眾韓洛華等從旁攔截張逆情急事迫自率全股死黨向正北拌命衝撲正與東軍之隊相值我軍人人奮勇大呼而前韓洛華等亦從旁鈔出該逆負創而逃我軍馬隊自後追殺沿途賊屍枕藉該逆亡命向東北奔逃正遇劉銘傳郭松林等督率諸軍乘勝兜剿豫軍亦自

南面前進該逆腹背受敵登時大亂我軍合隊掩殺復陣斬悍賊多名賊匪無路可逃見有大溝數道橫亘於前張逆率死黨縱馬猛撲妄冀過溝逃命維時溝中水深數尺賊騎一經墮入皆陷泥淖不能施展各軍會合一處以洋槍四面圍擊逆目張總導張政江程三老砍暨逆眾三四千人除爲各軍擒斬收降外咸斃於深溝積潦之中據擒賊供稱首逆張總愚爲洋槍所擊同時投水伏誅而徧查該逆屍身竟不可得復再三研究降眾僉供張逆已爲官軍圍裹在內及撤隊時見兵勇將該逆所騎之馬及隨身所帶黃鳳牽出若非就擒必死亂軍之中其爲張逆伏誅已無疑義伏查擒逆倡亂十四五年流毒數省自臣擒獲張落刑並捕戮張總愚之父張負刑後該逆以漏網餘生狼奔豕突今春竄近畿疆轉趨東豫數十州縣復被蹂躪實屬罪大惡極神人共憤幸蒙 聖

謨廣運指授機宜因運防以扼賊衝懸厚賞以勵士氣各軍同心
敵愾克奏膚功實足以快人心而伸 天討所有皖省各軍自本
年春閒出省牛師韓方長華黃秉鈞屢捷於豫省程文炳復追剿
於直境兩扼該逆北趨之路追賊竄運東各軍復與之縱橫角逐
往來數千里迄未喘息四月閒商定守運之計黃秉鈞張從龍方
長華等扼守運防程文炳牛師韓張得勝等專司游擊於炎天酷
暑大雨積潦之中奮勇苦戰卒能始終不懈竟此全功實屬勳績
卓著其尤爲出力之將領員弁自應先行繕具清單籲懇恩施分
別給獎以示鼓勵其餘出力員弁並懇 天恩俯准 臣查明保奏
出自 鴻慈又奏擒匪蕩平謹將應籌善後事宜據實臚陳一請
裁撤直隸練軍另選精銳以衛畿輔也查直隸勦練六軍原以備
緩急之用惟練軍平日所習者不過操演陣式從未經臨大敵猝

遇緊急一無足恃似可裁撤歸伍畿輔重地另簡精兵以資拱衛
爲長駕遠馭之計查淮皖豫各軍精銳可靠臣愚以爲可就此數
軍內選擇勁旅一萬八千人仍分爲六軍每軍計三千人立一統
帶而以兩軍併爲一路每路擇一大將領之其駐紮處所東路宜
在通州寶坻一帶西路宜在涿州良鄉一帶南路宜在固安新城
一帶皆距畿輔甚近平居則住營訓練一有調遣朝發夕至呼應
既靈事權亦一所需軍餉由何省調取之軍卽仍由何省供應不
必另撥餉項如此辦理既可隨同神機營勁旅環衛京師亦不至
虛糜軍餉一請酌畱皖省防兵以靖地方也查剿捻之軍皖勇居
其大半一經遣撤以皖人回籍者爲最多非獨皖軍皆潁毫人也
卽如淮軍初起之時勇皆募自六安合肥今則潁毫之人十居其
七豫軍亦十居五六而各軍收降之眾又皆係皖北土著安插既

定尤非以重兵鎮之不可應請於皖軍內挑留一萬二千人分爲四大枝每枝三千人選派得力將領統帶分駐要地聯絡彈壓遇有小醜滋事即時剿除不令滋蔓其東豫兩省應行酌留兵勇鎮撫地方亦請飭下東豫兩省撫臣一併察覈辦理具奏抑臣更有慮者願毫民情易動難安見在軍事既定宜寬其既往請再申明諭宣示凡捻逆未平以前所有爲匪之人已經投誠遣散者一律准予自新不准再行尋仇指控地方官亦不得藉端吹求以安反側此後再有作奸犯科之徒仍照例由各地方官隨時嚴辦以昭炯戒一請緩裁各省釐捐以佐軍食也見在各省之軍既須籌備西征又須畱防本省兵一日不能撤則餉一日不可缺查軍興以來各省地丁協餉多不足恃惟恃釐捐爲接濟應請照舊辦理暫緩裁撤以佐餉項臣愚見所及是否有當恭候 聖裁 上諭軍

機大臣等張總愚投水淹斃之說尙無確據見雖餘眾蕩平而首逆至今並無實在下落萬一含糊了事日後仍復潛出嘯聚再煩兵力尙復成何事體著該大臣督撫等嚴飭所部各將領實力搜查張逆是生是死必得實在確據方能撤防並著該大臣等迅速查明覆奏以慰厯繫張逆素性詭譎恐其薙髮潤迹潛逃過河著左宗棠官文崇厚等飭屬一體嚴拏毋稍大意其各處藏匿餘匪必當搜捕淨盡斷不可使一名漏網所有先後收降之眾爲數甚多前已密諭該大臣督撫等設法安插其著名頭目及反覆無常之輩斷難使其倖生諒已安速辦理自來降眾忽撫忽叛最爲大患況擒逆與流寇無殊該大臣等當引前事爲鑒不可苟且目前致棄前功諒該大臣督撫等深明利害必能措置得宜也其如何辦理之處並著妥商覆奏毋稍疏略正在寄諭聞復據英翰奏善

後章程各條並請撤皖軍各摺片所奏不爲無見其請撤直隸練軍畱勇扼紮一節都興阿左宗棠李鴻章官文俱久歷戎行目覩畿輔情形崇厚在津年久亦深知其得失卽著該大臣等會商良策以昭覈實西征事宜前因崇厚陳奏曾諭該大臣等於軍務完竣擇其願畱軍營者挑選入關除劉松山郭寶昌所部兩軍應由左宗棠統帶回陝接辦回務外其各營勇丁著李鴻章左宗棠等酌量情形奏聞候旨派往皖省應畱重兵並免其查究前案自係權宜辦理李鴻章籍隸皖省都興阿亦久在江南情形自必熟悉並著會商覆奏其東豫兩省應如何酌畱兵勇鎮撫地方之處並著丁寶楨李鶴年一併妥籌奏明辦理英翰著查明張逆實在下落餘匪肅清再行統帶回皖兵勇南下諒旬日之間必可蒞事正不必急急言旋也所請保舉出力員弁各摺單著暫畱中屆時再

行降旨優獎密片一件著畱中候旨妥辦將此由六百里各諭令知之○諭本日據英翰密片一件所陳不爲無見著將原片鈔給李鴻章閱看該大臣卽將所奏情形悉心妥籌辦理該降逆當日句結任張諸逆以致僧格林沁捐軀殊堪痛恨該大臣當將此意宣示庶見在降眾不至羣懷疑懼也將此由六百里密諭知之○諭劉嶽昭奏滇中匪股太多省圍難解請飭川軍移防爲勦一摺據稱迤西賊匪連陷楚雄澂江各府州縣二十餘處省城圍困已及半年賊匪愈聚愈多若延至七八月中滇事尤難措手見在鎮雄等處已就肅清川省防兵尙未遣撤請飭將四川筠連各處防軍仍歸提督胡中和統領出境移勦滇匪等語滇省匪氛一日未平卽川防一日難撤自應移師會勦以全危局而顧邊疆除劉嶽昭咨行胡中和辦理外著崇實迅飭該提督統帶筠連防軍取道

昭通直攻永北以擣賊巢該軍軍火口糧卽由四川隨時撥解俾資飽騰其尋甸一路並著劉嶽昭督率李家福等相機攔截遏賊旁趨岑毓英亦當激勵兵練將附省之賊痛加剿洗以期四面夾擊藉解省圍劉嶽昭另片奏續調之梁士美一軍甫抵晉甯卽退是滇練旣不足恃客兵尤不可遲等語所奏均係實情胡中和駐紮處所距滇非遠卽著該督飛調前進毋任在途逗畱該提督入滇後該督仍當與之妥籌進止會合滇省各軍以壯聲勢而殄寇氛將此由六百里各諭令知之○辛巳諭軍機大臣等蘇廷魁奏黃河險要各工見籌搶護一摺據稱上南廳胡家屯溜勢於六月二十四日以後忽提至榮澤汛十堡該處舊工久經淤閉隄身本矮此時水勢非常旺盛更兼徹夜風雨水由隄頂漫過刷寬口門二十餘丈等語該處險工亟宜搶護著蘇廷魁督飭所屬寬備稽

料廣集人夫乘此尙未奪漕之時趕緊盤做東西裏頭下埽占實
力追壓以維危局蘇廷魁所請續撥防險銀兩前已諭李鶴年迅
籌撥解著該河督仍一面飭司寬籌款項以資接濟惟須功歸實
用毋任該廳員等濫支冒銷徒糜帑項將此由五百里諭令知之
○諭庫克吉泰劉典奏甘回分途內犯各軍接仗疊勝暨文家川
等處擊賊獲勝各摺片甘省回逆由靈夏竄至麟游經中書吳士
邁等擊退其大股竄耀州三原提督周紹濂高連陞等追至雷
原合軍夾擊斃賊尤多黃鼎劉倬雲等軍復在邠州世店等處擊
敗馬正和同黨而同逆仍由三水內犯設伏原下劉倬雲督軍屢
戰賊始敗走赫阿渾馬偽元帥一股竄至中部之王村一帶亦經
魏光燾高連陞等四面鈔擊該逆眾淹斃殆盡見已檄飭高連陞
各軍相機進剿所籌尙屬妥協惟三水以北宜君以西賊蹤廣集

若不將甘回痛加勦洗則陝境何日得安著庫克吉泰劉典迅飭高連陞由同官一路乘勝前進其洛川中部等處並著分飭劉端冕周紹濂攔頭截擊毋任該逆喘息復肆蔓延所有洛東敗賊卽責令魏光燾實力跟追以期悉數殲滅回目楊汶治率黨竄踞文家川紅崖河及正甯之三家原一帶劉倬雲派隊分擊殺斃極多該逆踞堡抗拒復經喻兆圭等督隊圍攻連破賊壘賊向正甯北原上敗去仍著檄令劉倬雲嚴飭所部隨時偵探不得以逆蹤遠颺稍形疏懈將此由六百里各諭令知之○于陝西陣亡總兵官侯鼎綬等祭葬世職○壬午諭軍機大臣等昨據劉嶽昭奏請飭川軍移防爲剿當經諭令崇實迅飭胡中和統帶筠連防軍取道昭通直攻永北以擣賊巢該軍軍火口糧卽由四川隨時撥解茲據崇實奏稱胡中和係實缺提督有邊防營務之責難應鄰省徵

調等語見在滇南軍事萬緊餉絀兵單非藉援鄰省殊乏滅賊之策川省援黔之軍屢次獲捷該處軍務較鬆自應分力援滇爲自固藩籬之計仍著該署督遵奉昨日寄諭辦理毋得稍存膜視如該提督萬難移師入滇卽著崇實另籌一軍遴派得力將領星速統帶前往不得有名無實一應軍火口糧仍由川省隨時撥解該軍入滇後著劉嶽昭岑毓英遵奉前旨與之妥籌進止會合滇軍聯絡聲勢迅殄逆氛將此由六百里各諭令知之○允崇厚奏撥天津倉米賑恤難民○甲申諭軍機大臣等神機營奏擒逆蕩平餘匪尙須搜捕擬將設防各隊分別畱撤並請飭官文等責令各地方官查拏餘匪各摺片此次勦平捻股情形經李鴻章等先後馳奏當將安插降眾遣散兵勇各事宜諭令該大臣等悉心妥辦惟逆首張總愚投水伏誅情節是否可憑至今未據查覆仍著都

興阿左宗棠李鴻章英翰丁寶楨等懷違疊次諭旨迅速查明該逆是死是生總以得有屍身爲據毋得稍涉含糊致貽後患降眾人數過多若不妥爲鈴束必生事端並著左宗棠李鴻章英翰丁寶楨嚴飭各將領將所收降眾帶出直境妥爲布置以免滋擾各省遣撤勇丁亦著飭令分起撤回如有逗畱降眾及落後游勇卽責令沿途各地方官隨時拏辦恩承所部隊伍仍著在防駐紮用資鎮撫直隸各隊應如何分布畱紮著官文崇厚斟酌辦理定安所帶之密雲官兵著卽遣撤歸伍其京營派防各隊仍俟各省隊伍及降眾全數出境後再由神機營王大臣等奏請遣撤善慶溫德勒克西並京營派出吉林黑龍江馬隊及山東所調西丹馬隊著左宗棠李鴻章丁寶楨檄令該都統等分別覈實造冊將各隊管帶同京暫駐南苑聽候神機營調撥逆匪宋憬詩稽誅已久前

聞此股賊中有該逆在內何以見在各營並未提及著該大臣督撫等徹底查明毋任倖逃顯戮直東一帶向多伏莽見當大兵未撤之時搜捕較易爲力卽著都興阿左宗棠李鴻章官文崇厚丁寶楨乘此聲威如查有成股未散之著名匪棍派兵搜拏以清積患刻下捻股雖經殲滅其敗匪零散乘隙逃匿者尙復不少若不及早鏟除難保不於撤兵後復行嘯聚第各省兵勇與直東各處民團互相仇殺結怨已深豈可再使兵勇紛紛滋擾著官文崇厚丁寶楨各飭地方道府州縣官親帶紳團按地嚴拏餘匪如有敷衍了事及含混塞責者一經發覺卽將各該地方官指名嚴參按律治罪各村莊中有隱匿賊匪逃勇者並著從嚴究辦以遏亂萌儻搜捕各匪必須會同兵勇卽著官文等咨調在防京兵及本省駐紮官兵分別勦辦亦毋庸借撥客兵致多擾累將此由六百里

各諭令知之○諭總理各國事務衙門奏請改派西疆分界大臣
並請飭催將分界事宜迅速舉辦一摺布倫托海分界事宜前有
旨派李雲麟辦理該員見已革職所有布城分界事宜著改派明
瑤接辦新疆毗連俄境分定界址應建界牌鄂博等事關繫極爲
緊要宜如何迅籌舉辦乃布倫托海辦事大臣欲令烏科兩城先
辦而科布多參贊大臣將烏柯克卡倫迤西屬於布倫托海據原
議條約自西而東一語欲令布倫托海先辦烏里雅蘇台將軍又
以立界之事自應照原議由西而東而烏柯克卡倫係科布多所
屬仍欲令科布多先辦彼此互相推諉不知是何居心儻再任意
延宕貽誤事機該大臣等其能當此重咎耶著榮全奎昌明瑤懷
遵前旨各於應行建立界牌鄂博之處會同俄國分界官員詳慎
妥辦速爲了結麟興身任將軍於地方緊要事件尤不可畏難苟

安一意推諉有負委任布倫托海雖有勦匪事宜亦不可置分界
爲緩圖一味顛預致滋貽誤明瑤卽當斟酌情形會商麟興榮全
奎昌剋期辦理毋得遷延干咎原摺均著鈔給閱看將此由六百
里各諭令知之○李元度開缺養親以程誠爲雲南按察使

由進南道

遷

○乙酉李鴻章奏據劉銘傳郭松林查明張總愚之兄張總導

其弟張總先姪張政江及其族人張元並賊目程大老砍三老砍
四老砍馬老三樊大等均於陣前拏殺惟據拏賊供稱張總愚於
亂軍中先帶數十騎逃走經官軍追急餘賊潰散該逆僅帶八人
向東北秫叢中走去劉銘傳等派隊四路跟尋杳無蹤迹當令道
員余思樞率同淮軍各馬隊搜捕餘匪附近各州縣尋覓殆徧數
日以來已無一賊但聞民間紛傳張總愚投水淹斃旋據統領豫
軍張曜稟稱該營續收降賊王雙孜供稱是日實隨張總愚逃至

徒駭河邊親見張總愚棄馬投河淹斃當將王雙孜親提訊問據供跟隨張逆九月二十八日之敗張逆帶八人逃走王雙孜即在八人之內張逆先欲逃過黃河無奈黃水漲漫走至徒駭河濱勸令隨從七人各自逃命張逆卽下馬投水而死證之各營降眾所稱張總愚平日屢說事急必自尋死不肯顯受刑戮亦屬相符是其投水伏誅毫無疑義惟水漲河深事隔多日逆屍必已腐爛無從尋認謹照鈔王雙孜供詞恭呈 御覽仍將該降人羈留在營備質各處逃匿餘匪業經搜捕淨盡並無一名漏網各路官軍均已撤回原營休息再行陸續凱撤回省所有勦賊最爲出力人員謹先開列清單懇恩准予優獎又奏軍事大定所有安插降眾裁撤營勇各事宜自須次第妥籌辦理 臣擬飭所部各軍漸移南下以便就近措置惟見值中原奠定解甲有期犬馬戀主之誠不能

自己可否容臣將行營緊要各事料簡應畢即輕騎馳赴京師恭
觀天顏跪聆聖訓俾一切得有遵循如蒙俞允所有臣原領
欽差大臣關防一顆由臣齎京恭繳又奏捻逆倡亂已歷十數年
從前督辦諸臣如僧格林沁袁甲三等皆疊次埽穴擒渠戰功卓
越雖未克悉數蕩平其滅賊之心久而愈奮今在事各軍馬步多
係該前大臣舊部愴懷遺烈莫不感激涕零至見任大學士兩江
總督曾國藩接辦年餘謀定後戰雖未立見速效而長牆圍制之
策實已得其要領臣得變通盡利以竟全功實自曾國藩開之且
自回任後事事與臣和衷共濟籌餉籌兵不遺餘力見幸中原底
定可否分別加恩以慰忠藎此外凡勦捻以來文武大員歿於王
事者可否一律推廣皇仁而作士氣出自逾格鴻慈上諭內
閣李鴻章奏遵旨查明逆首張總愚實在下落各軍接捕餘匪淨

盡直隸山東一律肅清一摺李鴻章自督兵赴剿以來各該將領
隨同進剿均能奮勉出力自應渥沛恩施以示鼓勵所有單開尤
爲出力之提督劉銘傳著由三等輕車都尉晉爲一等男郭松林
著由騎都尉晉爲一等輕車都尉宋慶著賞給二等輕車都尉世
職張曜著賞穿黃馬褂並賞給騎都尉世職副都統善慶著賞給
二等輕車都尉世職溫德勒克西著賞穿黃馬褂並賞給騎都尉
世職山東布政使潘鼎新著賞給雲騎尉世職一等輕車都尉提
督黃翼升著賞加一雲騎尉世職總兵周盛波等十一員均著照
一等軍功從優議敘其餘出力人員著李鴻章查明彙案奏請獎
勵另片奏京卿赴營剿賊出力請旨獎勵等語候補鴻臚寺少卿
袁保恆經李鴻章派充翼長與前敵諸將妥籌防剿且冒暑督隊
能耐勞苦因思伊父袁甲三從前剿辦捻匪著有勤勞該京卿尙

能勉承父志袁保恆著開復前次降調處分仍以翰林院侍講學士補用並加恩賞給三品銜頭等侍衛陳國瑞經辦機營王大臣奏派管帶銳勇隊協剿捻逆打仗甚屬出力著賞還黃馬褂花翎勇號並開復總兵記名提督仍賞給雲騎尉世職○諭本日據李鴻章馳奏剿辦捻匪全股蕩平覽奏之餘實深嘉悅捻逆自倡亂東南十有餘年竄擾數省生民受其荼毒神人共憤罪惡貫盈上年派李鴻章爲欽差大臣剿除任柱賴汶洸等股匪本年正月間逆首張總愚復糾合匪眾肆擾山西河南直隸窺伺近畿經官文英翰丁寶楨李鶴年督兵防剿並經左宗棠統軍追擊朝廷復調李鴻章赴直東一帶督剿以收眾志成城之效見經李鴻章會同各軍督率各將領蕩平捻逆並將餘匪搜捕淨盡具見該大臣督撫等協力同心膚功克奏前已賞還李鴻章雙眼花翎騎都尉世

職黃馬褂並開復處分及左宗棠等降革處分均予開復自應分別再沛恩施以昭懋賞李鴻章著賞加太子太保銜並以湖廣總督協辦大學士左宗棠著賞加太子太保銜並交部照一等軍功議敘丁寶楨英翰著賞加太子少保銜並交部照一等軍功議敘李鶴年著賞戴花翎並交部照一等軍功議敘崇厚當捻逆攻撲天津時督率兵勇紳團力保郡城並籌濟各營糧石餉需源源不絕實屬著有勞績崇厚著賞加太子少保銜頭品頂帶並賞戴雙眼花翎兩江總督曾國藩籌辦淮軍後路糧餉軍火俾李鴻章等克竟全功著交部從優議敘署直隸總督大學士官文前在湖廣總督任內暨本年捻匪竄直時均因會剿不力屢經降旨懲處此次捻股悉平著加恩開復太子太保銜暨勦捻不力革職畱任處分並賞還雙眼花翎以示錫爵酬庸用彰慶賞至意○諭捻匪倡

亂以來十有餘年我 皇考文宗顯皇帝宵旰籌畫 指授機宜
朕御極以後仍派李鴻章等督軍勦辦次第掃除直隸等省一律
肅清洵堪上慰 在天之靈著派惇親王奕訢前詣 定陵敬謹
祭告並著翰林院迅速撰文呈進用昭誠恪○諭見在捻逆蕩平
直隸等省肅清朕於本月十一日親詣 壽皇殿行禮並景山
關帝廟拈香用申敬悃○諭原任欽差大臣科爾沁博多勒噶台
親王僧格林沁自咸豐三年督師勦捻疊殲巨寇懋著勤勞同治
四年四月間在山東曹州勦賊乘勝逐北中伏捐軀前已疊降恩
旨從優賜卹見在捻股蕩平逆首次第伏誅因思該親王忠勇性
成齋志以歿眷念殊勳倍深愴惻僧格林沁著加恩賜祭一壇派
盛京工部侍郎奕慶前往致祭用示篤念蓋臣至意○諭見在捻
匪全股肅清本日降旨將已故親王僧格林沁賜祭一壇因思已

故三品頂帶副都統伊興額從前在安徽等省勦擒戰功卓著嗣後隨同僧格林沁在山東東平州力戰陣亡該故員忠勇奮發未獲及身滅賊此時捻股蕩平追念前勦倍深憫惻伊興額著加恩賜祭一壇由富明阿派協領一員前往致祭用慰忠魂○諭侍郎彭玉麟奏病勢日深懇請開缺回籍一摺據稱治軍十餘年身受重傷積勞多疾咸豐二年間母喪未能終制見在東南肅清髮捻平靖軍事已完懇請開缺回籍等語情詞懇切出於至誠自應俯如所請兵部右侍郎彭玉麟著准其開缺回籍補行守制該侍郎帶領長江水師多年戰功卓著近年辦理善後一切事宜悉臻妥協朝廷倚畀甚深著於終制後卽行來京陞見聽候諭旨○諭軍機大臣等李鴻章奏查明逆首投水淹斃得有降賊確供各軍按捕餘匪淨盡直東一律肅清請循例陞見及恭繳關防各摺片逆

首張總愚前經各軍追逼後在徒駭河投水淹斃情形疊諭該大臣等詳細查覆茲據奏稱張逆寬已淹斃並鈔呈降賊王雙孜供單是該逆自知無可偷生投河淹斃其屍身被水漂去情節似尙可信降人王雙孜卽著羈留在營備質各處逃匿餘匪見雖搜捕淨盡而各營兵勇若仍畱紮德州一帶未免滋生事端著李鴻章飭令劉銘傳等將在營兵勇概行移撤大河以南妥爲鈐制該大臣俟各事稍畢再行來京陛見原頒欽差大臣關防並著陛見時齎帶至京恭繳其各營餉項卽由該大臣與曾國藩等設法籌措以資應用又據丁寶楨奏捻股蕩平見仍嚴密搜捕並辦理收降及各營見無降眾各摺片山東曹濟等處地方向爲匪徒出沒之所此次各軍撤回終恐有著名匪棍隻身伏匿溷迹偷生仍著丁寶楨通飭各府州縣文武嚴密搜查毋畱萌蘖以靖地方英翰所

帶援剿皖省及抽調西征之處著該署撫等會商奏明辦理左宗棠何以久無奏報劉松山郭寶昌疊次追剿捻逆甚爲出力喜昌亦尙奮勉著該大臣迅速查明奏請優獎將此由六百里各諭令知之○予山東傷亡提督胡良作祭葬世職○予河南陣亡提督陳振邦建祠○丙戌諭內閣昨據李鴻章奏職除捻逆直東一律肅清軍機大臣恭親王等贊理機務听夕慎勤今幸大功告成自應量予獎敘恭親王奕訢文祥寶鋆沈桂芬均著賞加二級軍機章京等夙夜趨公承書諭旨亦屬著有微勞著恭親王等分別奏請獎勵候旨施恩○諭昨據李鴻章馳奏剿辦捻匪全股蕩平地方一律肅清業經降旨分別加恩恭親王暨管理神機營王大臣自辦理巡防以來懋著勤勞茲當紅旗奏捷自當一體加恩恭親王醇郡王文祥崇綸均著賞加一級○諭溯自捻逆肆擾凡屬臣

工無不同深敵愾其盼捷音今幸巨患削平中原底定允宜普被恩施所有親郡王貝勒貝子公及中外文武大小臣工均著賞加一級入旗及綠步各營兵丁著戶部照見放章程賞給半月錢糧用昭恩賚○諭軍機大臣等昨據李鴻章馳奏查明逆首投水確情餘匪淨盡直東一律肅清請循例陞見等情當經諭令該大臣將在營兵勇移撤後再行來京陞見惟見在陝甘等省軍務緊要亟須左宗棠統帶原部劉松山郭寶昌喜昌等軍回剿著左宗棠卽飭令劉松山等軍一面拔營由山西渡河入陝將鄭延綬榆等處回氛節節掃蕩左宗棠著先行來京陞見李鴻章所部並各營兵勇陸續移撤大河以南爲數較多計須稍稽時日該大臣當遵奉前諭俟各事稍畢再行來京陞見陝省回匪紛擾股數繁多除劉松山等軍外各營將弁勇丁如有忠勇奮發願西往從征者並

著李鴻章左宗棠英翰曉諭各營聽候遴選歸左宗棠節制郭寶昌傷病見在計已全愈如尙未能銷假卽著郭運昌帶領該總兵舊部先行西進英翰卽統帶回皖各軍南下妥爲安插俟辦理就緒後再行回旗將此由六百里各諭令知之○飭都興阿回盛京將軍任○吳存義以病免調沈桂芬爲吏部左侍郎龐鍾璐爲戶部左侍郎轉殷兆鏞爲禮部左侍郎以杜聯爲禮部右侍郎由內閣學士○調黃倬爲兵部右侍郎轉鮑源深爲工部左侍郎以石贊清爲工部右侍郎由左副都御史遷○李鴻裔以病免以李元華爲江蘇按察使由兩淮鹽運使遷○丁亥諭內閣蘇廷魁奏上南河黃水漫口請將文武懲處並自請治罪一摺本年六月閒上南河廳溜勢提至榮澤十堡坐灣淘刷水勢擡高漫隄過水雖經該道廳盤做裏頭正河米至奪溜旁趨而口門已刷寬九十餘丈在工各員疏於防護

實屬咎無可辭除上南同知鄒梁辦理不善業經隨隄落水身故外該署河督請將廳員等分別革職議處尙覺過輕署上南守備王麟榮澤汎縣丞龔國琨署榮鄭汎把總朱永和均著卽行革職枷號河干以示懲儆開歸道紹誠著摘去頂帶交部照例議處蘇廷魁督辦河防是其專責未能先事豫防亦難辭咎著摘去頂帶革職畱任仍責成戴罪自效督率在工各員趕緊堵築毋稍延誤至漫水所經地方雖不甚遠而田廬淹沒人民流離殊堪憫惻著李鶴年迅飭地方官分別妥爲撫卹○諭軍機大臣等前據蘇廷魁李鶴年先後馳奏黃河南岸榮澤汎十堡漫口情形屢經諭令該撫等督飭各該道廳趕緊搶護茲據蘇廷魁奏該處漫口已刷寬九十餘丈雖經盤做裹頭正河未至奪溜而口門丈尺甚寬實屬修防不力蘇廷魁身任河督河務是其專責著卽趕緊鳩集料

物設法搶辦儻能迅速蔽功其咎尙可末減若再玩誤定當嚴懲不貸李鶴年見既前赴工所著卽星馳抵工會同蘇廷魁督率道廳營汛各員認真搶築隄工毋任大溜旁趨致成巨患北岸七壩及順二壩埝身爲黃水衝刷各壩數丈情形喫緊並著蘇廷魁李鶴年會督河北道堵禦搶護毋任再有疏失應需銀兩李鶴年當遵奉屢次諭旨力籌撥解毋稍遲緩同知鄒梁於所屬工次石料任聽土夫偷竊售賣漫無稽察致令失事殊堪痛恨業經隨隄落水身故應毋庸議嗣後各廳營汛文武各員弁如有此等玩誤情形該署河督當隨時訪察嚴參懲辦不得稍事姑息將此由五百里各諭令知之○戊子廣江蘇海門廳學額二名○庚寅諭軍機大臣等榮全奏革員通匪等情一摺已革伊犁總管德勤句通不肖官兵毆傷領隊大臣霍伽布等復與逆回勾結爲亂實堪痛恨

該革員見與伊犁避難官兵居駐圖扈魯克等處性情反覆難測榮全雖暫事羈縻仍當密爲防範並查明實在情形隨時具奏棍噶札勒參誤擄俄商牲畜前案業經榮全派員前往斜米辦理見值布倫托海變亂道途恐有梗阻仍著榮全添派妥員設法探明道路護送所帶銀兩前往斜米早將此案辦結將此由五百里各諭令知之○辛卯諭軍機大臣等前據李鴻章等先後馳報捻股肅清首逆張總愚投水淹斃疊經諭令該大臣督撫等搜捕餘匪並將各營勇丁分別次第凱撤見在餘匪是否搜淨各營勇丁如何分別撤歸應由何路行走未據李鴻章等覆奏近聞各營勇丁與民團尋仇互相鬪殺並有焚掠情事如果屬實必致激成事端左宗棠李鴻章官文崇厚英翰丁寶楨務當將各營勇丁妥爲彈壓不得再任肆行滋擾至直東各處境內藏匿餘匪諒亦不少諒

大臣督撫等自當認真搜捕務期殄滅淨盡捻股匪首不止一人有無潛匿他所漏網稽誅者此事不厭詳求總須力求真實確據著該大臣督撫等再行訪查並督飭所屬各地方文武認真按緝或爲民團及地方官所擒殺亦須訪求確據至搜捕餘黨事宜當飭令地方官督率各處民團辦理如須兵勇協助李鴻章等當揀派老成將領選擇誠實勇丁助緝不得任聽各隊勇丁紛紛四出藉爲爭功尋仇之舉前經諭令左宗棠等將崇厚英翰所陳畱撤勇丁事宜妥議具奏著卽迅速覆奏本日復據左都御史毛昶熙奏請飭劉銘傳赴直隸提督本任並統帶所部勇丁萬人在大順廣一帶駐防仍一面訓練營伍所陳不爲無見著左宗棠李鴻章官文安速會商覆奏另片奏請設局收繳凱撤勇丁火器馬匹等語著李鴻章英翰丁寶楨一併會商籌款辦理原摺著摘鈔閱看

片一件一併鈔給閱看將此由六百里各諭令知之○諭寄諭欽差大臣陝甘總督左宗棠直東軍務完竣以後誠恐餘匪潛藏伺隙萌發而兵團仇殺尤恐釀成禍患業經諭令各該大臣督撫等妥籌辦理惟近聞本月初三四五等日尙有捻股千餘人並有大頭目在內由德平樂陵一帶竄往鹽山經劉松山等軍擊勝復竄甯津等處以致難民紛紛遷徙見在情形如何該大臣駐紮處所相距較近著趕緊查明據實覆奏一面督飭各將士迅速殲除毋得稍畱餘孽致貽後患此次李鴻章等捷報頻仍該大臣何以無一字奏報著卽將官軍勦賊情形並交辦各件一併具奏又劉松山郭寶昌兩軍當早日部署以便事竣剋日西征前經諭令該大臣會同李鴻章英翰等遴選弁兵隨從前進見在如何辦理著趕緊定議馳奏以慰廑念將此由六百里諭令知之○諭曾璧光奏

勦辦安順股匪疊破賊營一摺貴州安順各路匪黨滋擾經官軍分投雕勦疊破賊營匪黨陳枝山率眾投誠擊退賀潘嚴督各逆受撫者一百餘寨六合團匪暨定南各團亦聞風向化自將逆苗擊退軍務尙爲得手惟嚴曾諸匪尙未殲除十三旗逆黨亦須大加懲創方免蔓延著曾壁光仍飭畢大錫等隨時相機勦辦迅掃逆氛其反正各團尤當妥爲鎮撫免致反側另摺奏黎平解嚴攻克寨頭各賊巢與劉岷前奏大略相同該署撫當嚴飭該管文武加意防範毋令匪蹤再肆奔突並檄令黔軍會合楚軍將清台施黃各苗逆次第掃蕩以靖地方將此由五百里諭令知之○毛昶熙奏軍務漸平請益思寅畏 上嘉納之○嚴諭京外整頓捕務○予貴州陣亡參將舒澤洛等祭葬世職○壬辰左宗棠奏據劉松山等呈稱六月二十八日追賊至山東高唐州南之張村遇劉

銘傳馬隊聞賊已悉數擒斬乃引軍北還七月初一日抵甯津營
次沿途收獲甫經薙髮之老賊金本利解至臣營臣親加訊究所
供逆首竄逸餘黨尙多情形雖未足盡信然其時張總愚旣無確
實下落自應盡力搜捕卽飭劉松山等挑選馬步各隊及駐紮梁
家集之馬隊分道前進向東北慶雲鹽山各路排搜而南初八日
暫回甯津據報沿途搜捕未見賊蹤臣仍飭劉松山等分途搜緝
並移行運河西岸水陸各軍暫緩撤防以昭慎密見在尙未收隊
至事後最宜慎者處置降人一節臣軍所收降眾先後其計七千
餘人被擄孩童籍隸本地者約千餘人當經各軍遣散其已經族
屬認領者數百名此外籍隸山西陝西及河北三府爲臣軍歸途
所必經者約四五百名擬安插各哨隨同行走就地資遣回籍其
疲乏病弱者約不過數百名遣之無虞惟其中壯健兇悍者不下

四千見經劉松山郭運昌挑畱數百隨行餘均在甯津營次臣擬暫以軍令鈐束之挈歸陝西及時斟酌辦理大約收降之要在嚴禁搜奪財物及無故欺凌侮辱以導引善機銷其悍戾之氣而察其狂悖猛鷙干犯軍令者鏹而去之庶可安反側而潛弭後患此次降人內有逆首陳玉城張落刑餘黨江南髮逆兩淮捻逆遺種頗多非辦理寬猛協宜緩急中節斷難期其弭首降心胥就軌度其效固難期之於一時而一切機宜操縱之說非所尙也至劉松山郭寶昌兩軍喜昌所部馬隊謹查明開單先懇 天恩獎勵上諭軍機大臣等張總愚淹斃情形左宗棠訊據賊供並採訪居民傳說未敢信爲真實證據其竄逸餘黨尙復不少自應迅圖搜捕以淨根株著飭令地方官督率民團實力搜剿如有應需兵力之處卽檄飭劉松山等選帶妥實隊伍相機剿擊仍一面知照運

河西岸水陸各軍暫緩撤防以期一勞永逸鹽山甯津等處賊蹤已否淨盡並著遵奉昨日諭旨妥爲辦理該大臣所收降眾數至七千餘人其中並有髮逆捻逆遺黨若輩懾於兵力窮蹙來歸雖不至遽形反覆而野性難馴駕馭頗非易事據奏將各降眾鈐以軍令挈歸陝西其籍隸山西陝西及河北三府者隨同各哨了定就地資遣所籌尙屬妥協卽著隨時斟酌辦理該大臣俟善後事宜稍爲就緒卽遵前旨來京陛見將此由五百里諭令知之○諭都興阿崇厚奏會籌設防各隊分別撤留並請入覲一摺盛京地方關繫極重前有旨諭令該將軍迅回本任且該省馬賊雖經大軍嚴行搜捕而萌孽易滋難保不復形蠢動緝捕事宜尤關緊要都興阿當懍遵前旨星速回任以重職守毋庸來京陛見所調各隊馬步官兵應如何妥爲遣撤之處並一切善後事宜均著崇厚

悉心辦理其劉景芳余承恩各軍應否要駐紮或即行裁撤著
崇厚咨商官文斟酌情形相機布置將此由五百里各諭令知之
○御史張緒楷疏請保泰持盈及時講學上嘉納之○予山東
陣亡副將蘇正達等祭葬世職○予安徽陣亡知縣孟煊建祠○
以陝西官軍勦辦捻匪出力賞提督劉松山黃馬褂並三等輕車
都尉世職郭寶昌騎都尉世職並賞還黃馬褂提督易德麟等升
敘有差○癸巳諭卓機大臣等李鶴年奏沁河斗漲民隄漫溢見
飭勘辦大概情形一摺據稱武陟縣西北岸趙樊村連日河水斗
長水高隄面溜勢頂衝該處隄身漫溢掣溜北趨口門約寬五十
餘丈由下游修武一帶行走見已設法堵築並派員馳往被水各
區分別賑撫等語前因滎澤汎十堡漫口當經諭令該撫馳赴工
所會同蘇廷魁督屬搶築茲復據報樊村民隄漫溢是前險未平

後忠汙至覽奏實爲焦急著蘇廷魁李鶴年會督該管道府廳縣等趕緊購集夫料設法堵築毋任汎溢無歸並查明水勢究由何處歸宿妥籌辦理李鶴年見已派員攜帶銀兩馳往被水各區會同該地方官雇覓船筏並帶席棚饅餅分投援渡賑撫所辦尙是惟水災較廣民困益深該撫務當嚴飭各該地方官及委員等妥爲撫恤毋令一夫失所榮澤漫口工程已否辦有頭緒秋汎前能否竣工現在大溜曾否全行掣動並著蘇廷魁李鶴年分飭趕築各廳文武員弁如有偷減玩誤情事蘇廷魁等當懷遵前旨隨時訪查嚴參懲辦該撫並檄飭藩司寬籌款項源源接濟以期河患早平藉蘇民困將此由五百里各諭令知之○乙未調曾國藩爲直隸總督馬新貽爲兩江總督以英桂爲閩浙總督由福州將軍遷○丙申以捻逆肅清免直隸疏防屬境司道守州各官處分復道員余

承恩職○丁酉諭內閣前因擒匪全股蕩平降旨將已故親王僧格林沁並已故副都統伊興額均加恩遣官賜祭一壇以彰忠盡因思擒逆竄擾安徽河南等省十有餘年各該省文武官員及各路軍營將領等或城破戰歿或臨陣捐軀忠義凜然皆未獲及身滅賊此時捻氛廓清追念前勦倍深憫惻所有按察使銜記名道安徽廬州府知府金光飭中閣學士全順記名布政使前福建汀漳龍道彭毓橘開復河南南陽鎮總兵邱聯恩江南徐州鎮總兵滕家勝提督銜署山東曹州鎮總兵郝上庠副都統舒明安河南河北鎮總兵余際昌正黃旗漢軍都統舒通額護軍統領恆齡副都統蘇倫保記名副都統常順總兵何建鼉廣西右江鎮總兵張樹珊均著加恩賜祭一壇由各督撫將軍都統等迅派參佐道府等員前詣各該旗籍致祭用慰忠魂○諭前因擒逆蕩平施恩在

事諸臣賞加左宗棠太子太保銜並交部照一等軍功議敘茲據左宗棠奏稱追剿無功難以忝竊請收回成命覽其情詞甚爲懇摯惟國家論功行賞自有常經該大臣其勉效馳驅用副委任毋許固辭○諭金順奏賊股麇集榆綏馳赴東路截剿並請飭催山陝協餉胡世英請假回籍各摺片花池等處竄匪雖經各軍截剿疊有擒斬而土回各匪股數甚多蔓延葭米並有髮逆袁姓大股竄至綏德亟應速籌剿辦金順酌留貴陞等扼守花定一帶親督胡世英等營兼程東進卽著該副都統督率所部迅赴榆郡會商庫克吉泰劉典視賊所向痛加剿洗迅殄逆氛榆郡與晉省永甯保德僅隔一河其東北神木府谷尤與歸綏相近著鄭敦謹嚴檄兵勇實力防守以固晉省門戶甘省回匪絡繹入陝應如何嚴扼竄路次第掃蕩之處著穆圖善庫克吉泰劉典金順會籌布置左

宗棠身任欽差大臣責無旁貸所有西路防剿機宜務當廣籌方略妥爲兼顧前據左宗棠奏參胡世英於保安安塞告急時並未派兵往援當諭令穆圖善查奏嗣據劉典奏該總兵不能約束勇丁復將胡世英撤去統領交劉典查參茲據金順奏稱該總兵擬請假五箇月回籍省親就醫等語胡世英著俟被參各節查辦完竣後再照所請給假令其回籍金順帶兵東進需餉極爲迫切著鄭敦謹劉典於應解該營協餉內先各籌撥銀數萬兩並籌軍火帳房一併速解金順軍營以資接濟劉典仍一面檄令延榆綏道飭屬籌辦糧石按日供支其糧腳各價准其作正開銷儻因糧餉缺乏致金順所部貽誤事機必惟該撫等是問將此由六百里各諭令知之○命彭玉麟赴江皖會籌長江水師事宜○予山西殉難郎中衛如圭等建祠○戊戌左宗棠奏前奉諭旨除劉松山等

軍外各營將弁如有忠勇奮發願西往從征者並著李鴻章左宗
棠英翰曉諭各營聽候遴選歸左宗棠節制臣維陝甘之事籌餉
難於籌兵籌糧難於籌餉籌轉運尤難於籌糧臣在陝時已曾約
略陳明矣從前勝保多隆阿入秦楊岳斌度隴皆務徵調兵勇爲
迅速驅除之計卒至兵多餉絀回患未平而潰軍叛卒之禍起譬
猶貧人無隔宿之糧而張筵召客強作豪舉有不噬其謬者乎論
者謂兩淮之人强悍健鬪用之秦隴可以挫回逆之兇鋒銷淮皖
之隱患於計誠爲兩得臣又以爲不然江淮之民尙氣任俠古昔
已然非生而嗜亂也巨逆如張落刑苗沛霖亦非果具梟雄之資
素蓄不軌之謀也始奇其詐力而獎進之繼悟其愚弄而牢籠之
終恨其桀黠遂圖舉其類而盡殄之譬猶癰疽初發不用內托外
消之方其後乃爲剜肉之計也淮皖諸軍皆新立功其將領皆富

貴矣若擇其樸勇而稍明紀律者分統之以資鎮壓又擇廉惠稍知方略之守令拊循而化誨之不出數年積習當可一變不此之務乃思移皖淮之隱患於秦隴乎隱患在畿郊驅而遠之可也所謂移腹心之疾置諸股肱也隱患在淮皖如圖驅之秦隴是移股肱之疾於股肱不可也論者又謂淮皖以軍入秦隴必仍由淮皖給餉臣乃過爲之慮無乃太愚不知淮軍之餉千人每月約銀六千左右雖與楚軍相等然近時每年止發九箇月之餉計算每勇每月不過三兩有奇此狙公賦芋之說也士卒之驕逸而難禁制其弊由此皖軍則每勇每月不過二兩四錢糧食由官給領亦不過三兩有奇豫軍亦然若至秦隴則糧價昂貴較之各省奚啻倍蓰若不籌津貼固無以齊其力而服其心若竟籌津貼此項餉銀又將安出臣於張曜宋慶程文炳歸統時曾請行首功之賞計張

隴宋慶兩軍賞過銀一萬餘兩程文炳一軍賞過銀三千餘兩此
暫時之計耳若處糧價昂貴之地厯窮年累月之久勢何能支迫
日久無功而或生他變而罪臣不善拊循不善駕馭臣固無辭然
將如秦隴何哉臣不得不早爲之計也見在各省將領營求入陝
者多未必卽爲忠勇奮發無須招之使來各省挑軍入陝之舉必
將有之未必容臣挑選臣擬似回陝後將陝甘餉事悉心考究度
可養勇若干再擇營哨各官赴安徽河南開募以符楚軍舊例此
時誠未敢草率從事致貽後悔也李鴻章奏欽奉諭旨以崇厚英
翰所陳善後各條令臣等妥速議奏查裁撤直隸練軍畱勇扼紮
一節接准官文函稱宣化遵化保定等軍或近接邊關或屏蔽畿
輔此三處擬汰弱畱強未便悉議裁撤至南勇久戰之餘誠爲勁
旅但慮直民愚蠢或未能耕鑿相安等語似係老成慎重之見臣

愚以爲兵丁之不得力非獨直省爲然蓋由綠營習氣太深兵力大半驕惰將弁又不一心勇則募自田野多樸拙習苦之人統領營哨各官自行挑選一氣呼應易於效命惟有事之時募勇以救急應變無事之時練兵以弭盜安民二者不可偏廢目下軍事大定勇丁逐漸裁撤各省綠營必須及時整頓畿輔拱衛關繫尤重若專用本省兵勇人地自較熟習防務亦可經久惟須將領得人認真簡練耳欽奉諭旨責成在防京兵及本省官兵接捕餘匪似可無須畱勇扼紮臣所部淮軍均係南人轉戰六七年去家數千里久役思歸若畱駐北方勇與民素不相習久亦未必相安至皖省應畱重兵並免查究前案一節實係因時制宜之策應請飭下兩江督臣安徽撫臣察度妥辦臣復查安徽之潁亳宿蒙江蘇之徐海山東之曹沂河南之歸汝各屬地界毗連風氣犷悍見在散

勇降眾惟皖徐豫東交界之人爲最多即使設法安插而民貧地瘠生計艱難勢不能人人得所目前兵威鎮懾斷不可少尤須慎選牧令加意教養認真緝捕安徽撫臣宜常駐潁壽一帶就近控制並懇飭下江皖東豫各督撫曉諭交界各州縣圩寨團練照舊整理以期化莠安良卽有滋事散勇零股馬賊亦不得逞志矣又奏遵查收降各頭目除疊次反覆及從逆多年者分派親信弁兵隔別正法外其籍隸河北各屬者當經分給護照川資交地方官遞解回籍內有籍隸黃河以南急求遣歸者亦勒令收繳馬匹分起雇船由運河押令南渡至年力強壯無家可歸且有不願回籍者暫畱各營補充勇夫俟裁撤時再設法安插此等降人飢寒無賴則聚而爲盜衣食有資則變而爲良將來各路遣撤應如崇厚所議酌畱營勇暫養驍健免其滋生事端其已經散歸地方者則

在良有司督同紳團勤求教養妥爲鈴束庶可消弭隱患 上諭
軍機大臣等左宗棠奏遵覆善後事宜並料理西征各摺片李鴻
章奏辦理善後並陸續撤勇籌辦降眾各摺片淮皖等軍見既無
願往陝境自請投效之人左宗棠亦稱其於西征情形不便且淮
軍月餉數目與各營優絀亦殊諸多未便該大臣擬就見有兵力
辦理陝省軍務如需續行添兵卽擬在皖豫等省另行招募著卽
照所議辦理直隸所屬地方李鴻章既稱南勇與民情恐不相習
且久役思歸著卽照所議將劉銘傳郭松林等軍陸續裁撤分駐
徐州濟甯周家口等處速行籌補欠餉俟補足後卽行裁撤歸籍
英翰所部皖軍前據該撫奏稱擬挑留一萬二千名分爲四枝選
派將領扼紮要地鎮守曾經諭令李鴻章等會商茲據李鴻章覆
奏與該省意見相同著英翰卽將遣將選兵並分紮何處妥籌布

准李鴻章所陳駕馭降眾事宜本日已明降諭旨飭令兩江安徽各督撫妥辦矣蒙亳一帶民風素稱强悍將來散遣降眾歸籍錯處尤易滋生事端英翰當慎選賢能牧令妥爲整頓李鴻章請令皖撫常駐潁壽一帶就近督察控制所陳不爲無見著英翰妥議具奏捻股投降賊目及兇惡反覆並籍隸蒙亳從逆多年之匪業經李鴻章派員正法其餘脅從降眾均著收回軍械分別遣留妥爲安插將此由五百里各諭令知之○諭李鴻章奏請飭撫恤難民等語見在捻股蕩平各路兵勇陸續裁撤其鹽山慶雲滄州武定等處向多鹽梟出沒每圖勾結滋事該處此次被擾較重設或難民無業可歸被匪勾結難保不復行嘯聚擾害閭閻瘡痍餘生曷克當此著官文崇厚丁寶楨懷遵前旨督飭地方官將難民分別撫恤毋令流離失所庶不至迫於飢寒窮極思亂至梟匪兇獷

性成頑梗難化見雖懾於兵威暫時弭伏兵退之後難保不故態復萌著該督撫大臣等督飭兵勇實力巡緝隨地鏟除以靖亂階並責成各該地方官隨時查拏有犯必懲毋得視為具文日久生懈李鴻章奏宋憬詩並不在此股捻匪之內惟該逆狡猾萬分難保不仍在直東交界一帶潛匿著官文丁寶楨飭屬嚴查毋任該逆漏網將此由四百里各諭令知之○諭江南安徽河南山東各督撫飭屬修理圩寨整頓鄉團○允左宗棠奏調總兵官馬德順赴陝西差委○以直隸山東運防穩固子傳振邦以提督簡放○己亥于江蘇陣亡在籍中書馬釗祭葬世職○庚子諭軍機大臣等曾璧光奏請飭四川湖南等省嚴督席寶田各軍分進剿辦以竟全功等語覓在龍里貴定兩城均經克復後黔省軍務漸有轉機若川楚援剿各軍遽行撤退不惟前功盡廢必致後禍尤烈據

曾壁光奏石阡思南因撤兵太速餘匪已有百十爲羣漸肆擄劫者且由龍貴東下直至鎮遠清黃施乘一路苗教各匪林立非川軍楚軍分途進擊黔局殊屬難支所奏均係實情唐炯奏聞劉嶽曙所帶川軍見已進取玉華山轎頂山尙大坪等處著崇實迅飭唐炯等由北而南縱橫奮擊不可稍涉遲延臬司席寶田前已給假兩月見計假期將滿著劉峴檄令該臬司仍率所部由黔省下游取道前進期與川黔各軍三面夾擊使苗教各匪首尾不能相顧以壯聲威崇實等素顧大局諒不至以得勝卽止忽視鄰封所有席寶田唐炯各軍並著崇實等懷遵前旨將各該軍飭歸曾壁光節制其各營餉項軍火仍由該省源源接濟用資飽騰曾壁光亦當飭令張文德督率黔中將弁乘此聲威奮力追剿並隨時與川楚各軍互相策應逐漸接除以清餘孽本日據崇實奏生擒越

揭夷酋勒烏立茲見飭越廟廳監禁等語該夷西攻城擄掠疊拒官軍實屬異常兇悍俟將歷年所擄漢人盡行交出後著卽盡法處治毋稍姑容西昌冕甯等處攻剿事宜並著遵奉本日諭旨妥籌辦理將此由五百里各諭令知之○實授曾璧光貴州巡撫○以貴州督辦軍務出力賞提督張文德珍物實授黎培敬布政使道員林肇元以按察使用○劉嶽昭請運粵鹽以抵滇餉允之○予四川陣亡參將鄧有才等祭葬世職○官軍復貴州龍里貴定縣城予總兵官汪柱元以提督用○于宋儒袁變從祀 文廟○辛丑諭軍機大臣等成祿奏北路潰勇殲除淨盡南山肅清見合諸軍攻取肅城一摺據稱仁字軍潰眾盤踞金塔附近之舊寺墩等處僭立偽號經該提督飭令楊占龍率隊圍攻擒獲逆首喬鍾嶽餘黨悉就殲除其南山一帶屯莊亦經馬天祥等次第攻拔等

語該提督正當乘此聲勢懾遵疊次諭旨振刷精神激勵將士勒
限將肅城剋期收復星速出關以贖前愆儻仍玩誤遷延藉詞支
飾則是自取咎戾國法具在決不能再邀寬典也楊占鼐業經調
集各隊行抵下河清滾營前進卽著穆圖善傳知該員迅速會合
諸軍立將肅城攻克接替軍務毋許延宕致該提督有所藉口將
此由五百里各諭令知之○諭麟興榮全奏科布多竄賊退去人
心稍定及酌練本城兵丁錫綸奏難民叛形日張蒙兵不能用命
會商仍復舊制各一摺布倫托海滋事兵民間棍噶扎勒參起兵
追剿之信俱往青格里一帶科城見屬安謐惟據錫綸奏叛民張
愚等在土爾扈特肆擾後西竄烏隴古河該處與博塔山等境相
連設難眾南竄勾結避難民人再行北擾則烏科大局何堪設想
見在該難民多掠駝馬其意向圖遠竄正宜糾集蒙兵及早進剿

著麟興榮全錦丕勒多爾濟奎昌福濟明瑤錫綸審賊所向就見
有兵力分投攔擊並知會棍噶扎勒參及土爾扈特相機兜剿不
得以逆蹤稍遠輒形疏懈其在廠之男婦老幼並著麟興等選派
幹員妥爲開導將所掠之馬匹軍火等項並令趕緊交出福濟錫
綸係查辦此事之人固不可稍形決裂亦不可一意遷就致滋貽
誤李雲麟被參各情仍著福濟等懷遵前旨切實查明覆奏毋稍
徇隱烏里雅蘇台戍守額兵卽著照麟興等所擬分別調練惟不
得虛應故事徒費餉需錫綸奏十蘇木蒙兵不能用命請仍復舊
制以期剿辦得力等語著卽會同奎昌福濟明瑤將改復塔城舊
制事宜先行妥籌一面曉諭該蒙兵隨同棍噶扎勒參跟蹤追剿
以靖邊氛錫綸摺一件已交原派會議王大臣妥議具奏將此由
五百里各諭令知之○予甘肅陣亡參將黃達源等祭葬世職○

王寅論內閣湖北學政張之洞奏府州縣試錄送過濫請申明舊
例以定限制等語向來府州縣錄送文童荒謬不通至五十卷以
上者參處立法本嚴自軍興以來被兵省分士子播遷流離備嘗
艱苦是以於考試時每寬其科條廣其登進藉以培養士氣茲據
該學政所奏近來府州縣積習相沿於考試文章全行錄送並不
遺漏一人以致院試時每有塗寫雜字並鈔寫他題成文以及槍
冒傳遞懷挾等弊層見疊出於士習文風大有關係此等惡習他
省諒亦不免著各該省學政嚴飭各府州縣遇考試文童時查照
舊例認真刪汰錄送不准過濫其實有事故正場後始經趕到者
定期於院試將近彙齊補考一次認真屆試荒謬不通者屏絕不
錄並嚴禁搭冊等弊其有藉考試爲名希圖滋事聚眾擾害者並
著地方官嚴拏懲辦以正士習而絕弊端將此通諭知之○諭湖

北學政張之洞奏各省捐輸加廣學額請覈實辦理並請變通廣額章程等語軍興以來各省捐輸團練經費均准加廣學額原於鼓勵人心之中寓嘉惠士林之意若如該學政所奏近來各省開報捐數動多浮冒以致各州縣廣額過多其中根柢淺薄文藝顯疏者濫竽充數殊非朝廷培植人才之意嗣後各直省督撫於所屬捐輸團練經費務須查明實用實銷之款切實覈減方准奏請加廣學額不得任聽籠統開報致滋流弊並著該部將原定捐輸廣額章程量爲變通與御史范熙溥摺一併妥議具奏○諭軍機大臣等文麟景廉奏修築營寨堵擊出關回匪並委員沿途被劫等情各摺片哈密地方緊要亟須大員帶兵前往鎮守疊經諭令文麟等迅赴該城該辦事大臣等稽遲日久又藉口於城垣坍塌欲於哈密附近蔡巴什湖一帶安設營寨另圖修築其畏難苟安

之心已可概見著文麟景廉懷遵前諭卽行督隊先後馳赴哈密
暫駐蔡巴什湖一帶將哈密城垣趕緊擇要修整爲振奮堅守之
計不得苟且粉飾致懈眾心自干咎戾肅州逆匪屢次出關竄擾
安玉所屬地方經文麟等派兵擊退仍須加意嚴防不可稍形鬆
懈並著成祿會同楊占鼐速行攻拔肅城不准再事遷延任令該
逆到處滋蔓安玉等處打仗陣亡並出力弁勇及捐辦軍餉各員
名均著文麟等查明彙案奏請獎卹都司龍騰光由關外起程前
赴歸化城迎提山西餉銀行至毛目地方爲該處變勇擄劫行李
並將公文護照一併擄去龍騰光亦被變勇擁入堡內前據成祿
奏稱肅州城外變勇業已殲戮殆盡何以毛目地方尙有分股肆
掠著卽趕緊派兵搜剿並將龍騰光下落查明其被擄公文護照
恐爲變勇執持前赴歸化城冒領軍餉著鄭敦謹桂成詳細查明

並著將此項餉銀五萬兩迅派妥幹弁兵解赴文麟景廉軍營交納以應急需將此由五百里各諭令知之○癸卯諭軍機大臣等李鶴年奏榮工口門刷寬估計籌堵一摺覽奏曷勝焦急前據蘇廷魁李鶴年先後奏報漫口情形聲稱口門尙未刷寬方期趕緊堵築易於蒞事乃見在榮工口門已刷寬二百餘丈若任其潰溢將來逐漸塌卸勢將何所底止著蘇廷魁李鶴年嚴飭道廳及在工各員弁趕緊盤築兩壩裹頭毋令再行衝刷俟霜清水落卽行設法堵合此次裹頭工程正在急需著准其先在司庫挪湊以濟要工將來舉辦大工再行奏請籌撥餉需惟須嚴飭在工員弁等各矢天良務當涓滴歸公不准絲毫糜費並將下游各工力保平穩南北兩岸附近各州縣卽飭其廣購料物刻速運工以備應用榮澤鄭州中牟祥符尉氏扶溝一帶被災處所著李鶴年遵奉前

旨妥爲周恤並飛咨下游江皖各省查照辦理毋令一夫失所是爲至要將此由五百里各諭令知之○諭庫克吉泰劉典奏剿辦回逆獲勝並籌防東竄情形一摺回逆大股由中部竄至洛東援及白水等縣各村鎮並攻撲邵陽縣城池經官軍分路剿擊大獲勝仗該逆連受大挫圖回老巢復經官軍分路堵剿於蒲城三原富平等處斬馘甚多並於同官羅州各境內疊獲勝仗其繞竄涇陽等縣並續竄宜君中部之賊均經官軍擊敗逃回者僅二千餘人剿辦尙屬出力著庫克吉泰劉典查明酌量彙案請獎見在賊匪雖已敗遁難保不去而復來仍著嚴飭各將士實力堵剿毋令復行竄擾魏光燾一軍旣經劉典飭令休息店頭隆坊之賊亦須添兵會剿卽著飭令成定康先行馳赴中部會同周紹濂相機剿辦將此由五百里各諭令知之○予陝西陣亡副將陳清彥等祭

葬世職○甲辰諭軍機大臣等崇實奏川師克復寶安縣城疊破賊巢生擒首逆見進規尙大坪一摺貴州自寶安縣城失陷後玉華驕頂諸山均爲賊匪巢穴勢甚猖獗經唐炯督率同知鄧錡總兵劉鶴齡等軍由袁家渡龍阬江界河三路渡江前進克復寶安縣城並玉華山大小驕頂山賊巢焚毀淨盡逆首何雙富王超凡等均擒拏正法開寶餘慶各境一律肅清惟尙大坪賊巢尙未攻破見已督軍進規該處爲開州平越通途地方緊要仍著崇實飭令唐炯乘此聲勢激勵各軍先將尙大坪老巢規復並會合黔楚各軍將下游苗教各匪節節掃蕩以靖黔疆將此由五百里諭令知之○劉秉璋以病免以胡大任爲山西布政使譚鍾麟爲河南

按察使

由浙江杭嘉湖道遷